

四庫全書

史部

欽定四庫全書

史部

御批續資治通鑑綱目卷十

詳校官修撰臣錢 榮

編修臣程嘉謨覆勘

總校官候補中允 臣 王燕緒

校對官主事 臣 王學海

謄錄監生 臣 蔣 濬

欽定四庫全書

御批續資治通鑑綱目卷十

起乙未宋徽宗政和五年凡十一年
盡乙巳宋徽宗宣和七年

乙未五年春正月女真完顏阿古達稱帝國號金

阿古達既屢勝遼其弟烏奇邁率將佐勸其稱帝阿古達不許鄂蘭哈瑪爾普嘉努兀瑪哈復以為言阿古達遂於正月朔即皇帝位且曰遼以賓鐵為號取其堅也賓鐵雖堅終亦變壞惟金不壞不壞金之色白完顏色尚白况所居在安春水之上於是國號大金改元收國更名旻以烏奇邁為安班貝勒薩哈舍音為古倫貝勒其國語謂金為安春謂尊大為安班謂國相為古倫舍音亦阿古達弟薩哈阿庫納之孫

也

發明

稱者不宜稱也是故不宜王而王則書稱王
不宜帝而帝則書稱帝稱皇帝稱目所謹者

中外之辨於阿古達雖書稱帝號金其後止以號
舉僅進稱人於其卒也斥名而書死至二世烏奇
邁始進而稱主以其漸染華風故耳此春秋待吳
楚君之例也春秋吳楚止以州舉外之也今綱目
於女真亦以號舉者蓋以春秋待吳楚諸國者例
之所以立內外之防也然則金之強盛已見後十
餘年漸起侵伐之端矣
此又君子之所深懼也

廣義

抑觀阿古達起自海上其志不小故其所得
成就焉彼其背遼之初衆勸其稱帝乃曰何

示人之不廣也衆又勸之復不許衆迫之且曰吾
將思之然則其視草寇之得一隅獲一勝而遂稱

尊僭號者大不侔矣
其興也不亦宜乎

晏州夷反以趙適為瀘南招討使平之

知梅嶺砦高公老之妻宗女也嘗出金玉器飲晏州
夷酋卜漏等漏心艷之會瀘帥賈宗諒以斂竹木擾
諸部且誣致其酋卜固謗等罪夷人咸怨漏遂相結
因上元張燈襲破梅嶺砦高公老妻及其器物四出
剽掠梓州轉運使趙適聞之倍道趨瀘劾宗諒罷之
詔康延魯代宗諒聽適節制適陰有專討意兵端益
大於是詔發陝西軍三萬以適為招討使適與別將
馬覺張思正分道出期會於晏州漏據輪縛大困其
山岨起數百仞林箐深窅諸村因夷為適敗潰者悉
赴之乃壘石樹柵以守適軍不能進巡檢种友直所
部多思黔土丁習山險而山多獠適遣土丁捕之伐
去蒙密緣崩石挽藤葛而上得獠數十頭束麻作炬

灌以膏蠟縛於孫背暮夜復遣土丁負繩梯登崖巔乃絕梯引下人人街枚挈孫蟻附而上比鷄鳴友直等悉力擁刀斧穿箐入及賊柵出火燃炬孫熱狂跳賊廬舍皆茅竹孫竄其上火輒發賊號呼奔撲孫益驚火益熾官軍鼓譟破柵賊擾亂不復能抗赴火墮崖死者不可勝計斬數千人生擒卜漏晏州平拓地千里適為建城砦畫疆畝募人耕種且習戰守號曰勝兵

遼遣使如金議和金不從

遼主使僧嘉努持書往金議和使為屬國阿古達遣薩喇復書云若歸叛人阿蘇遷黃龍府於別地然後

議之

廣義

方是時也乃遼主怠忽荒政之日正金主卧薪嘗膽之秋遼弱金強蓋可知矣夫何遼主

視為蕞爾小國遣使持書既名曰和又使為屬國
果何義哉宜其倔強不服而反有倨傲之辭也

金擊遼兵於達魯噶城大敗之

金主自將攻遼黃龍府進薄益州州人走保黃龍金
取其餘民而去遼遣都統鄂爾多左副統蕭伊蘇右
副統耶律章嘉努都監蕭色佛呀將騎二十萬步卒
七萬戍邊且屯田以為長久計金主聞之率衆趨達
魯噶城登高望遼兵若連雲灌木狀顧謂左右曰遼
兵心貳而情怯雖多不足畏遂趨高阜為陣摩囉歡
以右翼先馳遼左軍左軍却羅索尼楚赫衝遼中堅
陷陣力戰尼瑪哈以中軍助之遼兵遂敗金兵乘勝
追躡至其營會日已暮圍之黎明遼軍潰圍出金人
逐北至阿魯岡遼步卒盡殪耕具數千皆為金人所
獲是役也遼人本欲屯田且
戰且守故併其耕具皆失之

廣義

嗚呼金主可謂知兵者矣觀其謂左右曰遼兵雖衆心貳而情怯不足畏也則其胸中自

有定見而勝負先決於此不待羅索尼楚赫尼瑪哈摩囉歡等斬敵陷陣而後知也議者不可謂敵

人無

熙河將劉法敗夏人於古庫勒

童貫遣熙河經畧使劉法將步騎十五萬出湟州秦鳳經畧使劉仲武將兵五萬出會州貫以中軍駐蘭州為兩路聲援仲武至清水河築城屯守而還法與夏右廂軍戰於古庫勒大敗之斬首三千餘

發明

詭道而勝之曰敗譏黷武也王者之兵禁暴誅亂今夏人未聞犯邊而遽興大衆較勝遠

夷方且君驕臣諂粉飾太平謂之何哉故綱目於諸將伐夏皆曰攻曰克曰敗所以貶之也合前後

書法觀之見綱目貴
義不貴功之深意耳

廣義

春秋傳詭道勝之曰敗夏人雖戎出兵征之要在有名堂堂中國而以詭道勝敵人不不足

取也

二月立定王桓為皇太子赦

桓帝長子顯
恭皇后所生

廣義

王者建儲即擇端人正士以為師傳講明格致誠正之學以為脩齊治平之本則後日必

無多慾之累吾知土木之功不興禱祀之非不作能去奢侈能絕玩好百度惟貞百志惟熙而宗社有所托生民有所仰矣今以是年二月立太子三四年間未聞求一賢人輔導青宮至宣和元年纔

得一楊龜山亦不過為祕書郎而不曾使其左右太子也其故何哉蓋由徽宗平素厭正人妬正學非正道故也厥後父子如金蓋有由矣

以童貫領六路邊事

時永興鄜延環慶秦鳳涇原熙河各置經畧安撫司以貫總領之於是西兵之柄皆屬於貫

三月遼遣使諭金降

遼主使章嘉努等六人齎書使金猶斥阿古達名冀其降金主以為書辭慢侮留五人獨遣章嘉努還報書亦斥遼主名諭遼主降

廣義

遼主嘗使耶律僧嘉努如金議和金主不從反得其倨傲之辭况師屢出而屢為其挫衄

豈不知其為勅敵又使使諭降哉其報書斥辱也
宜矣于時遼主自當內脩德政外睦鄰國選將用
賢降詔罪已輯邊郵謹斥堠回顧國中無有不善
彼必為之聽命矣今也舍已之田而耘人之田宜
乎自己甫田之荒穢而功亦不及於他人之
畝畝也故曰國必自伐而後人伐之信哉

夏六月作三山河橋

蔡京以孟昌齡為都水使者鑿大岨三山兩河創天
成聖功二橋調役夫數十萬民不聊生至是畢工未
幾水漲橋壞

廣義書曰不作無益害有益功乃成今當鄰國侮
慢之秋正當君臣協心脩舉政教改絃易轍
以號今天下可也不知作此河橋與夫前之玉清
陽和延福等官果何益哉分注曰調役夫數萬民

不聊生嗚呼譬猶百圍之木膏液
內涸然後風可得以拔也哀哉

遼復遣使如金金人執之

金主以書辭慢留
遣使蕭薩刺不遣

廣義

遼主嘗遣使如金議和得其倨傲之辭再遣
使如金諭降致其斥名之辱今也猶不知省

又使使持謾書以往宜乎使之被執而不遣
也子貢曰多見其不知量也其遼主之謂乎

秋七月朔日食○八月作明堂

初元豐禮官以明堂寓大慶殿別請建立以盡嚴奉
而未暇講求至是下詔內出圖式宣示於崇政殿且
以明堂宜正臨丙方近東以據福德之地乃徙祕書
省於宣德門東而以省地營之命蔡京為明堂使開

局興工日
役萬人

發明

見作不宜作也三山明堂非大事而必書之者

食前作三山調役夫數十萬民不聊生此作明堂
開局興工日役萬人況六月八月亦農事方殷之
時興作如此則傷民之力闕民之食為可見矣人
君愛民如子恤其饑寒救其疾苦而用民之力歲
不過三日安有三月之間兩興大役民其可得安
生乎大抵節儉之君惟恐民之弗逸奢侈之君惟
恐民之有逸每相反而已矣文王惠鮮鰥寡懷保
小民詎若是之作無益哉絕民之君天必絕之他
日之亂其及救乎
故備書以深識之

廣義

夫明堂者王者發號施令之所王政之所由
出者也今徽宗作此明堂無一善政之出則

欽定四庫全書

卷十

孰若不作之為愈也雖曰美之
實貶之也豈愛禮存羊之意哉

遼伐金

遼主下詔親征女真率蕃漢兵十餘萬出長春路命
蕭奉先為御營都統耶律章努副之以精兵二萬為
先鋒餘分五部北出駱馳口別以漢步騎
三萬南出寧江州發數月糧期必滅女真

廣義

金雖倔強遼之屬國也然其屢無禮於遼宜
遼之聲罪致討焉綱目大書于冊正名定罪

也

有星流出於柳

其光照地色赤黃有尾占者以為天子宗廟
有喜國家建造宮室之祥蔡京率百官表賀

發明

凡書有者所未嘗有者也星流出柳其光照地變異莫甚於此矣蓋示變而警天心之自

然遇變而懼君心之當然宋之君臣未聞更相戒飭圖惟脩己而且以為天子宗廟有喜國家建造宮室之祥蔡京鄙夫率官表賀嗚呼小人之蒙蔽其君可勝言哉是時徽宗失德無益繼作其宮室之建靡有休息而蔡京等不能引君當道顧乃長君之惡狐媚狼貪苟馬無恥必正之以春秋之法京其誅首歟綱目特筆于冊其義蓋可見矣

廣義

嗚呼朝廷興土木之工而勞民傷財其不祥莫大焉蔡京反率百官為賀其欺天罔人也

孰甚

安置太子詹事陳邦光於池州

蔡京獻太子以大食國琉璃酒器羅列宮庭太子怒曰天子大臣不聞以道義相訓乃持玩好之具蕩吾志耶命左右碎之京聞邦光實激太子諷言者擊逐之

發明

有事是君為容悅者有以安社稷為悅者何則懼容悅之小人有以妄悅而病吾君之心

也君心勤政彼病之以豫逸君心憂亂彼病之以宴樂君心裕民彼病之以聚斂君心靜治彼病之以威武是皆小人之故態耳蔡京以琉璃酒器獻納東宮之中太子不悅遂命撞碎蔡京歸罪邦光羅織竄逐光何罪邪蓋由小人之心惟以得君為念意豈不曰天子既被蠱惑繼天子而主天下者太子也苟不預為賄賂他時何以容身故先進玩好以要結之不惟病君之心抑且固君之寵所以其謀不成而遂忌邦光也吁小人之不利君國信矣

九月金取遼黃龍府

金主攻黃龍府次混同江無舟以渡金主使一人導前乘赭白馬徑涉曰視吾鞭所指而行諸軍隨之以濟遂克黃龍府遣蕭薩喇還遼曰若歸我叛人阿蘇即當班師

廣義

大抵國之所以興者雖曰人為實惟天耳然則栽培傾覆天豈以中外異哉分注載金主

渡混同江之事其亦可怪也夫嗚呼光武信濬沱河水之堅金主藐混同江水之淺同一機耳噫濬沱之水混同之水天耶人耶天也

遼軍渡混同江副都統耶律章努作亂伏誅

遼師渡混同江副都統章努與耶律淳妃弟蕭迪里及其甥蕭延留等謀迎立淳誘將士亡歸上京遣迪

里以其謀告淳淳曰此非細事主上自有諸王當立
北南面大臣不來而汝言及此何也密令左右拘之
有頃遼主使行宮實達爾伊遜等持書至言章努之
謀淳即斬迪里等携其首單騎詣廣平淀待罪遼主
遇之如初章努知淳不見聽乃率麾下掠取上京府
庫財物至祖州率其黨告太祖廟數遼主過惡移檄
州縣遂結渤海羣盜至數萬趨廣平犯行宮不能克
率衆北走順國女真阿固齊以三百騎一戰勝之擒
其貴族二百餘人並斬以徇餘得脫者皆奔女真章
努詐為使者欲奔女真為邏者所獲縛送行在要斬
於市

廣義

悲夫遼主之渡混同也勃敵迫之親戚畔之
譬諸尨羸之人而又加以寒疾不汗其能保

有厥躬乎綱目大書而備載分注者所以
正即律章努之罪以見遼事之不濟也

王厚等攻夏臧底河城敗績夏人遂大掠蕭關

厚與劉仲武合涇原鄜延環慶秦鳳之師攻夏臧底河城敗績死者十四五秦鳳第三將全軍萬人皆沒厚懼重賂童貫匿不以聞未幾夏人大掠蕭關而去

發明

王厚攻城不克失律喪師未聞有詰責之舉夏人大掠蕭關縱其出入未聞有備禦之謀則宋人玩法弛備之情可見矣欲其不亂蓋亦難焉此綱目微顯闡幽之深意也

冬十二月金襲遼軍於呼卜圖岡大敗之

金主聞遼出軍勞面仰天慟哭曰始與汝等起兵蓋苦契丹殘忍欲自立國今天祚親至奈何非人死戰莫能當也不若殺我一族汝等迎降轉禍為福諸軍皆曰事已至此惟命是從金主遂帥師迎敵遼主自

將至馳門駙馬蕭特默等將騎兵五萬步卒四十萬至噶琳灤金主行次約羅與其臣謀曰遼兵號七十萬其鋒不可當吾軍遠來人馬疲乏宜駐於此深溝高壘以待之會獲遼督餉者知遼主以章努反西還已二日矣諸將請乘怠擊之遂追遼主及於呼卜圖岡金主曰彼衆我寡兵不可分視其中軍最堅遼主必在焉敗其中軍可以得志使右翼先戰左翼合而攻之遼兵大潰枕籍相屬百餘里獲輿輦帝幄兵械軍資他寶物馬牛不可勝紀蕭特默焚營而遁金主亦引退

廣義

是役也遼主無章努之叛則遼金勝負未可知矣孟子曰寡助之至親戚畔之其遼主之

謂乎

丙申
六年春正月遼將高永昌據遼陽以叛

遼東京留守蕭保先嚴酷渤海苦之正月朔夜半有惡少年十餘乘酒執刀踰垣入府刺殺保先戶部使大公鼎聞亂即攝留守事與副留守高清明集奚漢兵千人盡捕斬之撫定其民裨將渤海高永昌時以兵三千屯八甌口見遼政日衰金兵方強遂誘渤海并戍卒入遼陽據之旬日之間遠近響應有兵八千人因僭號稱隆基元年遼主遣蕭罕嘉努張琳討之

癸明

永昌之入遼陽也而直書曰叛何也人臣當國家蹇難之時則必公爾忘私國爾忘家委

置其身可也夫何見遼日衰遂懷異志乃據遼陽改元僭號則其罪之暴白亦不可掩矣故直書據遼陽以叛據者不順之詞叛者不赦之罪其與春秋書晉趙鞅入于晉陽以叛同意學者宜並觀之

賜方士林靈素號通真達靈先生

靈素溫州人少從浮屠苦其師咎罵去為道士善妖
幻往來淮泗間丐食僧寺僧苦之及王老志死王
仔昔寵哀帝訪方士於左階道錄徐知常知常以靈
素對即召見靈素大言曰天有九霄而神霄為最高
其治曰府神霄玉清王者上帝之長子主南方號稱
長生大帝君陛下是也既下降於世其弟號青華帝
君者主東方攝領之又有仙官八百餘名今蔡京即
左元仙伯王黼即文華使鄭居中童貫等皆有名而
已即仙卿褚慧下降佐帝君之治時劉貴妃方有寵
靈素以為九華五真安妃帝心獨喜其事甚加寵信
賜號通真達靈先生賞賚無算為改溫州為應道軍
靈素本無所能惟稍習五雷法召呼風霆間禱雨有
小驗而已

發明

人君之德莫大乎明能明則不明弗能蔽矣
莫大乎正能正則不正弗能間矣靈素乃邪

柔鄙夫以妖術惑衆誠清朝之所必誅而不貸者也徽宗因徐知常之薦召對賜號寵錫尤隆可醜之甚徽宗自即位以來賢人君子未聞召用而方士小人信無虛日豈不深可惜哉靈素市井無賴之徒初無驚世駭俗之行抑不知通何之真達何之靈乎直書於冊其失自見

廣義

考之分注靈素本無他能惟駕一通空虛誑誕之辭以聾瞽徽宗之耳目其無羞惡之尤

者也夫何徽宗悅其無徵之獎即加無算之賜其昏愚孰甚焉嗚呼信虛無者莫甚於徽宗罹慘禍者亦莫甚於徽宗後世人君有崇信虛無者尚鑒于茲

以童貫為陝西兩河宣撫使○劉法攻夏日木多泉城

屠之

童貫使劉法劉仲武合熙秦之師十萬攻夏日
木多泉城城中力守援不至乃降法受而屠之

發明

兵者禁暴誅亂之具不可不用而又不可輕
用童貫擅開邊釁與夏構兵關古之民困於

鋒鏑其禍慘矣劉法等方且阿諛苟容願指氣使
故不曰伐而曰攻貶之詞也迨夫既克其城即
肆屠戮是乃爭城以戰殺人盈城抑豈得為王者
之師耶他日戰於統安身且不保然則窮兵黷武
者果何益哉時天下益疲外患疊至而宋之君臣
未聞內脩外攘之策顧乃溺於宴安養成禍亂謂
之得計可乎直書曰
屠所以著其暴也

渭州將种師道克夏臧底河城

師道世衡
之孫也

閏月立道學

從林靈素之言也尋詔太學辟雍各置內經道德經莊列博士二員又用蔡京言集古今道教事為紀志賜名道史

廣義

鳴呼玉石不可以相用薰蕕不可以同處奪朱亂雅君子惡之今也徽宗攻乎異端之極

不惜吾道之害獨不觀夫白圭不以蠅矢而玷太清不以纖雲而翳雖使異端雜於吾道之中然於吾道固無所損而徽宗則徒貽萬年之臭也此舉陋哉

二月作上清寶籙宮成

帝聞林靈素之言於景龍門對晨暉門作上清寶籙宮密連禁署宮中山色平地環以佳木清流列諸館

舍臺閣多以美材為楹棟不施五采有自然之勝上
下立亭宇不可勝計帝時登皇城下視之由是開景

龍門城上作複道通寶
錄宮以便齋醮之事

發明

作不宜作也然宮殿書作於是月成於是月
者譏速費也徽宗感林靈素之言立道學作

寶錄兩月之間二事並舉國家大政廢而不恤勞
民傷財無時休息自古繼世之君未始不成於戒
謹而敗於逸豫也於乎內作色荒外作禽荒甘酒
嗜音峻宇雕牆有一於此未或不亡徽宗皆兼而
有之雖欲不亡烏可得乎是以古之人君當以繫
于苞桑為戒人臣當以旻天板蕩為勉此所以常
保其泰而無
顛危之失也

廣義

大抵禁者人君燕息之所深宮固門闔寺守
之何等嚴密雖親王不得涉其境者別嫌疑

也此日碑所以不惜其子而傷於忍歟若使外人得以出入其中惡在其為宮禁哉觀分注之所載則知徽宗之志荒矣

夏四月金人攻高永昌殺之遂取遼東京州縣

永昌使人求援於金且曰願併力以取遼金主使呼實布謂永昌曰同力取遼固可東京近地汝輒據之以僭大號則不可若能歸款當授王爵永昌不從金主乃遣幹魯帥諸軍攻永昌時遼張琳等討永昌久不克幹魯與戰敗之遂取瀋州永昌大懼率眾拒金遇於活水金師既濟永昌之軍不戰而却遂北至遼陽城下明日永昌盡師其眾與金戰又大敗遂以五千騎奔長松遼陽人北卜嘉執永昌以獻金主殺之於是遼之東京州縣及南路繫遼女真皆降於金金主以幹魯為百路都統沃稜知東京事

發明

攻者自相搏擊之詞殺者殺非其罪之詞取者收奪之名皆所以貶之也然永昌既據遼

陽悖君叛國乃亂賊耳曷為不書討書誅而書攻書殺耶蓋阿古達之叛君猶高永昌之叛國不過以賊攻賊不以討賊之例予金也況金之攻永昌是乃利其土地非能倡義而討之者故下書曰遂取遼東京州縣則其義亦可見矣

廣義

高永昌遼之叛臣也納叛春秋惡之觀金主謂永昌曰同力取遼固可東京近地汝輒據

之以僭大號則不可若能歸款當授王爵斯言也何其正大之若是哉及其殺永昌得東京即除遼法省賦稅其與中國之興者無異孔子曰夷狄之有君不如諸夏之亡也信哉

何執中罷

執中輔政一紀年高疾甚賜之寬告尋以太傅就第
朝朔望儀物廩稍一如居位時未幾卒執中嘗為端
王侍講故終始恩遇不替然無所建明
惟以謹畏迎順主意贊飾太平而已

詔蔡京三日一朝總治三省事

京改都堂為公相廳詔
京總治三省正公相位

五月以鄭居中為少保太宰劉正夫為少宰鄧洵武知

樞密院事

時蔡京大興工役民不聊生變亂法度吏無所師鄭
居中每為帝言帝亦惡京專乃拜居中太宰使伺察
之又以正夫議論數與京異拜為少宰居中存
紀綱守格令抑僥倖振淹滯士論翕然望治

六月遼以耶律淳為都元帥○秋八月以侯蒙為中書侍郎薛昂為尚書左丞○九月帝詣玉清和陽宮上玉帝徽號赦

帝奉玉冊玉寶如玉清和陽宮上玉帝尊號曰太上開天執符御歷含真體道昊天玉皇上帝詔天下洞天福地修建宮觀塑造聖像又上地祇徽號曰承天效法厚德光太后土皇地祇上寶冊儀禮一如上帝尋改宮名為玉清神霄宮又鑄神霄九鼎安置於上清寶錄宮之神霄殿

發明凡天子所臨曰幸尊之之詞也前史皆書幸和陽綱目變文曰詣所以譏徽宗崇尚虛無

故貶而卑之也蔡京大興工役民不聊生變亂法度吏無所師則其肇亂之基莫甚於此徽宗弗為

之懼而乃溺信無稽崇飾虛禮易曰帝出乎震傳曰帝者天之主宰其尊無對詎必加以徽號云乎獲罪於天無所禱也徽宗所為若此而殊無一毫省已之心使或疲民而奉天天其為我祐之哉凡不再貶而其義自見者此類是也

廣義

傳曰以理言之謂之天以主宰言之謂之帝焉而非理烏能主宰即天與帝非有二也

一理而已故字書加一字於大字之上此所謂其尊無對者也世之庸夫愚婦不諳乎此往往以為有一袞冕丈夫號為玉皇大帝據於青天之上崇奉之則降福銷災不然則獲罪戾殊不知凡百所為合理則福違理則禍書曰作善降之百祥作不善降之百殃然謂之降者非從上降下之降皆本於吾心自有之天善惡一萌禍福隨之以其合在天之天故有若降之然也苟如世俗之論動作不

必合理但崇奉玉帝自能獲福若然則為盜為奸之徒亦嘗設齋誦經崇奉矣而終必敗露死於桎梏非命者何也此可見上天無私非如世俗之所謂也徽宗之於玉帝既加以美名又詔告天下則其所以崇奉之者至矣盡矣不可以有加矣厥後斥辱敵庭號為昏德而死於沙漠者何玉帝之不仁而不一青盼也綱目書此誠足以發千古之笑臣故廣此義以俟談理者評之

冬十月以白時中為尚書右丞○夏人寇涇原屠靖夏城

夏大舉攻涇原靖夏城時久無雪夏先使數萬騎繞城踐塵漲天乃潛穿壕為地道入城中城遂陷屠之而去

發明

冠者賊之也屠者暴之也前書劉法屠日木多泉城此書夏人屠靖夏城迺相報復無時

休息率土地食人肉其禍慘矣其罪甚矣然非夏之跋扈乃宋之自取也安在窮兵啟釁而可以為王者之師乎綱目特書於冊以為後世憤兵之戒耳

十二月劉正夫罷

正夫在相位能迎時上下持祿養權至是以開府儀同三司致仕

廣義

分注載正夫在相位能迎時上下持祿養權至是以開府儀同三司致仕觀此則知正夫

之行其異於馮道者幾希矣豈有身為宰執而素行若此哉綱目所以削其官者鄙之也

茂州夷內附置壽寧延寧軍

欽定四庫全書

御批續資治通鑑綱目
卷十

十一

丁酉 七年春二月大理入貢

廣州觀察使黃隣誘大理入貢詔以其主段和譽為雲南節度使封大理國王

帝幸上清寶籙宮命林靈素講道經

時道士皆有俸每一觀給田亦不下數百千頃凡設大齋輒費緡錢數萬貧下之人多買青布幅巾以赴日得一飮餐而視施錢三百謂之千道會且令士庶人聽靈素講經帝為設幄其側靈素據高座使人於下再拜請問然所言無殊絕者時時雜以滑稽嫖語上下為大闕笑莫有君臣之禮復令吏民詣宮授神霄秘籙朝士嗜進者亦靡然趨之

發明

是時天下雖平然小人猖獗天下陵夷此正憤恥自強之時而君臣相與從事虛無何哉

蓋蔡京王黼之為相而童貫為之將三人皆佞道者也太學不幸而幸寶錄國政不講而講道經未幾遘警侵迫敵至則罷講敵退則仍前甚至冊為教主道君皇帝帝言天神降於坤寧殿紛紛交舉政和之政日以紊矣特書屢書不一書而止皆所以深貶之也其與唐書置百萬座講仁王經同意

夏四月道錄院上章冊帝為教主道君皇帝

帝諷道錄院曰朕乃上帝元子為太霄帝君憫中華被金狄之教遂懇上帝願為人主今天下歸於正道卿等可冊朕為教主道君皇帝於是道錄院上表冊之然止於道教章疏內用

發明迷而後悟者謂之中人以下迷而不悟者謂之下愚不移徽宗酷信虛無舉措失義可愧之甚焉冊者上封下之詞以臣而冊君其禮安乎以天子為道君其義正乎徽宗敦尚道教貶抑佛

法不過一偏之見耳非謂之至言也善乎劉文安公定之曰佛本西域之人而其徒謂佛之身體面貌皆若金色徽宗所謂中華被金狄之教指佛教而言也然其言可謂妄矣未幾女真起自渤海建號大金旋據中原斯言若為之先兆也唐僖宗紀元為廣明是時黃巢初起曰唐去君而存黃以為廣此黃當代唐之徵後之論者謂天記昏主以告亡於世徽宗之言豈不類此噫以文安公之言驗諸書法參諸分注為益信矣是故傳曰善必先知之不善必先知之綱目特書於冊所以深譏之爾

廣義

分注載徽宗諷道錄院曰朕乃上帝元子為太霄帝君閔中華被金狄之教遂懇上帝願

為人主今天下歸於正道卿等可上表章冊朕為教主道君皇帝於是群臣及道錄院上表冊然止用於教門章疏內而不施於政事其亦惡無禮也嗚呼徽宗此舉可謂無耻之甚矣設此誑誕之語

以欺人吾誰欺欺天乎況人君為民物之主凡有冊命皆出於君非君則不敢專也今異端者流反得冊一至尊其諸謂之何哉其意不過欲愚夷人俾其知畏上帝不敢無禮於我故也殊不知金人淳樸之風尚多於徽宗矣孔子曰夷狄之有君不如諸夏之亡也厥後父子同歿於外則是反受金人之教而不知自己所主之教果安在哉闢異端尊中國儒者之事也世變一至於此可哀也已

六月明堂成○秋七月置提舉御前人船所

時東南監司郡官二廣市舶率有舉奉又有不待旨但送物至都計會官者以獻大率靈壁太湖慈溪武康諸石二浙奇竹異花海錯福建荔枝橄欖龍眼南海椰實登萊文石湖湘文竹四川佳果木皆越海渡江毀橋梁鑿城郭而至植之皆生而異味珍苞則以健步捷走雖甚遠數日即達色香未變也至是蔡京

又言陛下無聲色犬馬之奉所尚者山林間物乃人之所棄但有司奉行之過因以致擾願節其浮濫乃請作提舉淮浙人船所命內侍鄧文誥領之詔自後有所用即從御前降下乃如數貢餘不許妄進意欲以便民而實擾害如故

發明

孟子曰禹湯文武以仁得之桀紂幽厲以不仁失之然則天下之存亡在仁不在仁之間耳

徽宗窮奢極欲不恤國政無益繼作斂怨四海天下其岌岌矣詩曰天之方蹶無然泄泄而蔡京諸臣不能盡心匡救而乃阿諛苟容是時東南監司大為民害既知其弊宜當速蠲而蔡京小人方欲節其浮濫嗚呼陋矣雖置人船擾害如故果何益哉故綱目直書以著其失

熙河環慶涇原地震

旬日不止壞城壁
廬舍壓死者甚衆

發明

楊氏萬里曰和氣致祥乖氣致異是二氣之相應猶桴鼓也和氣者政平訟簡興賢育才

是也乖氣者反是是故和氣充溢而祥瑞生乖氣充塞而災異見熙河環慶涇原乃鄰夏之地而徽宗內不修德用兵西夏今而地震旬日不止得非此之應歟徽宗方且溺於虛無恣不之懼謂之何哉綱目不言事應而事應具存所以曉後世之人君遇災而懼之意也夫豈無故而書之耶

八月鄭居中罷

居中與蔡京不相能至是以母喪去位京以居中王珪婿也乃使蔡確子懋重理定策事遂追封確清源郡王御製文立石墓前欲借是憾居中然卒不能害懋即謂也

遼置怨軍

遼主自燕至陰涼河募遼東人為兵使報怨於女真
號曰怨軍凡八營屯衛州蒺藜山以渤海鐵州人郭
藥師等為帥

冬十月侯蒙罷

蔡京惡之也

十一月命蔡京五日一赴都堂治事

發明

王衍未用識者知其必壞蒼生後用之而為
晉禍盧杞未用識者恐其他日之得志後用

之而為唐害信乎小人不可不防之於其始是故
履霜之警恐其堅也取女之戒懼其壯也童牛之

牯防其盛也金柅之繫止於進也無非拒絕於未
進之時如舜之去四凶成王之誅管蔡是也蔡京
敗壞天下蠱惑君心不能明正其罪而乃屢加寵
渥謂之何哉前書詔蔡京三日一朝總治三省事
此書命蔡京五日一赴都堂治事何若是之尊崇
乎吁若徽宗者知有蔡京而不知有天下耳一書
再書深
貶之也

○起復鄭居中為太宰以余深為少宰白時中為中書
侍郎十二月以薛昂為門下侍郎○方士王仔昔下獄
死

仔昔倨傲而顛帝待以客禮故遇宦侍若童奴又欲
羣道士皆宗已林靈素忌之乃與宦者馮浩誣以言

語怨望
下獄死

廣義

分注載靈素忌仔昔與宦者馮浩誣以言語怨望下獄死今綱目所書有若徽宗殺之者

何蓋生殺人主之大權
仔昔得罪於徽宗故也

有星如月南行

發明

西晉之末五星互經天縱橫無常唐末星交流如織今此有星如月南行可謂變異之甚

矣然當時君臣未聞有恐懼修省之意故自是而後兵禍滋熾宇縣分裂生民屠戮幾盡歷二十餘年而後止綱目大書於冊天戒豈不明哉

○帝言天神降於坤寧殿詔示百官

帝感於林靈素之言建宮觀徧天下又造青華帝君
正畫臨壇及火龍神劔夜降內宮之事託天神臨降
造帝誥天書雲篆務以惑世欺衆其說誕妄不可究
質宦者道士有所不快必託為帝誥則莫不如志尋
加靈素號通真達靈元妙先生張虛白通元冲妙先
生視中大夫出入訶引至與諸王爭道都人稱曰道
家兩府其徒美衣
玉食者幾二萬人

發明

古先聖君之治天下恒守正道罔敢怠忽不
作無稽不為非禮故能永保天命而無傾危

也易曰危者安其位者也亡者保其存者也亂者
有其治者也是故君子安而不忘危存而不忘亡
治而不忘亂是以身安而國家可保也徽宗安而
忘危存而忘亡治而忘亂乃下愚耳蓋天者理而
已矣凡陰陽之屈伸者謂之鬼神鬼神之道二氣
之良能也豈有形像之可覩如徽宗所云者嗚呼

君者孟也臣者水也孟方則水方孟圓則水圓徽宗自欺如此安有人不我欺乎哉前書帝以天神降詔百官此帝言天神降皆所以深譏之耳

廣義

嗚呼王言如絲其出如綸書曰大哉王言由是知詔者人君以言而詔告天下者也然謂

之王言非大公至正者不可以教乎人今徽宗以怪誕不經之言而詔天下則是黃屋中居一浪說之人耳尚何以君人乎哉

以童貫領樞密院事

內侍自古無賜坐者時貫加開府儀同三司領樞密院每春秋大燕則坐於執政之上日與宰相同班進呈畢即自屏後入內復易窄衫與羣閣為伍出則為大臣當體貌之禮入則為近侍執使令之役古所未

也有

作萬歲山

初帝以未得嗣子為念道士劉混康以法錄符水出入禁中言京師西北隅地協堪輿倘形勢加以少高常有多男之祥始命為數仞岡阜已而後宮生子漸多帝甚喜始信道教於是蔡攸岡阜為異聞謂有珠星壁月跨鳳乘龍天書雲篆之符以逢迎之遂竭國力以經營土木之工至是又命戶部侍郎孟揆於上清寶錄宮東築山以像餘杭之鳳凰山號曰萬歲

發明

作不宜作也徽宗視民財猶瓦礫輕民命猶草芥謂之守成之君可乎昔商民所大病者

其政貪散財發粟之令一下而四海服秦民所大病者其政酷約法三章之令一下而萬民悅周漢

之興無非以得民心而興商秦之亡無非以失民心而亡徽宗惑蔡攸之狂言興土木之大役於戲民之財力有限國之興作無窮雖日夜之所息雨露之所長尚弗克濟况財力非草木之可比乎若徽宗誠可謂寄生之君耳特書於冊深惡之也

竄侍御史黃葆光於昭州

初葆光為左司諫始蒞職即言三省吏猥多乞非元豐舊制者一切革去帝命釐正之一時士論翕然蔡京怒其異已密白帝降內批云當豐亨豫大之時為衰亂減省之計徒為符寶郎明年復拜為御史至是大旱帝以為念葆光上疏言蔡京彊悍自尊侈大過制無君臣之分鄭居中余深依違畏避不能任天下之責故致此異疏上不報京權勢震赫舉朝結舌葆光獨出力攻之京懼中以他事竄之昭州

發明

楊氏曰君不自任則大惟不自任其智而兼衆智是以大其智故曰智臨大君之宜二帝

三王之聖一也舜曰大舜禹曰大禹好問拜昌言而已徽宗即位以來忠諫之臣貶斥殆盡當時以言為諱無敢倡者葆光力劾蔡京遂為竄逐則是自任其智而無可為之勢明矣自古人君未有閉塞言路而能致治者此徽宗所以終於危亡而不救也直書竄而不去其官則其義不待辨說而自明矣

廣義

考之分注黃葆光言當時大旱由蔡京專權之所致舉朝結舌而葆光獨力攻之其事不

異於鳳鳴朝陽也綱目樂道人之善故於葆光之竄不惟銜之而又地之也

遼耶律淳及金將烏撈古戰於疾藜山敗走金遂取遼

八州

遼主使淳會四路兵馬防秋淳遺金咸州都統烏楞古書議和烏楞古告於金主金主猶以歸薩喇及阿蘇為言淳軍至蒺藜山烏楞古及知東京事沃梭等進攻顯州遼怨軍帥郭樂師乘夜襲走之烏楞古遂與淳戰淳敗走烏楞古追至額勒錦陂遂拔顯州於是乾懿豪縱成川惠七州皆降金

金遣使求封冊於遼

遼東鐵州人楊朴言於金主曰自古英雄開國必先求大國封冊金主從之使至遼時遼東諸州盜賊蜂起掠民以充食樞密使蕭奉先等勸遼主許之

廣義

金主求封於遼遼亦許其所求可謂兩得矣此即淮陰求王於齊之計耳雖欲不許不可

也得也

戊戌重和元年春正月作定命寶成

于闐上美玉踰二尺帝命製寶文曰範圍天地幽贊神明保合太和萬壽無疆篆以魚蠹制作之工幾於秦璽號曰定命寶合前八寶為九寶以定命寶為首且曰八寶者國之神器至於定命乃我所自制也寶成帝御殿受賀肆赦

發明

古之人君不戒懼於蹇難之時而戒懼於豐亨之日驕生於安儉生於危故也吳氏曰自

處於危者乃自安保位之道也凜乎若將亂者乃所以常保其存常有其治也蓋於久安存治之時而能不忘危亡亂之禍是以身之位得以安而國家可保其久存長治也徽宗無益繼作愈肆驕矜

欽定四庫全書

御批歷代通鑑輯覽
卷十

每以秦政漢武為法噫其志亦陋矣他時客死五國天下紛擾命何可定實何可補耶綱目一書再書不一而足皆所以深貶之爾

廣義

書曰天難諶命靡常厥德保厥位由是知欲定天命顧人君之德何如耳非由一玉璽

也是以成湯能顧是明命以卜商世於六百文王知峻命不易以卜周世於八百考之前史未聞湯武仗玉璽而延長有如此者厥後召公之告成王曰王厥有成命治民今休蓋言成王能繼天出治則庶幾天有一定之命而治民今即休美矣亦未聞召公之貴玉璽也惟呂政得一玉為璽欲傳之萬世僅二世而亡後世人主何不察此動以秦璽為慕今徽宗得玉製寶其文曰範圓天地幽贊鬼神保合太和萬壽無疆篆以魚蠹制作之工幾於秦璽號曰定命寶嗚呼秦皇父子尚得死於國中

徽宗父子則墮身夷地又秦皇父子之不若也孰謂天之定命在五而不在德也哉

以王黼為尚書左丞

黼美風姿有口辯寡學術而多智善佞初以何執中薦累官左司諫張商英為相寢失帝意帝遣使以玉環賜蔡京於杭黼覘知之因數條奏京所行政事并擊商英及京復相德其助已歲中三遷為御史中丞黼欲京專國遂疏執中二十罪已而改翰林學士會京與鄭居中不合黼復內交居中京由是怨之徙為戶部尚書將陷以罪黼以計獲免還為學士承旨遂入政府

二月遣武義大夫馬政浮海使金約夾攻遼

建隆中女真嘗自其國之蘇州泛海至登州賣馬故道猶存至是有漢人高藥師者泛海來言女真建國

屢破遼師登州守臣王師中以聞詔蔡京童貫共議命師中募人同藥師等齎市馬詔以往不能達而還帝乃復委童貫選人使之遂使武義大夫馬政同藥師由海道如金政言於金主曰主上聞貴朝攻破契丹五十餘城欲與通好共行弔伐若允許後當遣使來議通金好自此始

發明

不曰伐而曰攻明遼之無罪著宋之黷武也禁暴誅亂王者盛心救災恤鄰中國善政是

時女真侵遼憑陵沙漠誠王法之所必禁天子不能舉弔伐之師四鄰不能有救援之義而反利人土地約攻契丹是乃助桀無道耳魯公會戎春秋所耻曾謂中國天子而可與敵人共攻耶建隆二年女真入貢是外邦求通於中國也重和元年馬政使金是中國求通於外邦也厥後遼亡未幾宋亦不保果何益哉綱目書此亦謹始慮終之戒云

廣義

分注云通金好自此始
臣謂與金譬亦自此始

夏五月朔日食○秋七月以鄭居中為少傅余深為少

保○八月以童貫為太保○九月掖庭大火

自甲夜達曉大雨如傾火益熾凡斃五千餘間
苑後廣聖宮及官人所居幾盡焚死者甚衆

發明

嘗觀天變之應速緩不一應之速者如此書
以童貫為太保而下書掖庭大火元書封巴

延為秦王是日秦州山崩地裂之類是也有應之
緩者如王安石創立新法而三司火用兵西夏熙
河環慶涇原地震之類是也楊誠齋曰夫閣寺為
患從古有之惟信之愈深則為害愈烈南司之臣
可傾而北司之勢終敗甘露之禍可免而鳳翔之
變難逃漢鼎一移而曹節安在唐祚不振季述亦

亡所謂信之愈深則為害愈烈者蓋以此也童貫聞人以為太保果何為哉下書掖庭大火則天怒之意為可知矣徽宗迷而不悟悲夫

薛昂罷以白時中王黼為門下中書侍郎馮熙載范致虛為尚書左右丞○鄭居中罷

居中乞持餘服詔許之

廣義

居中此罷得矣綱目何不書其官惡其依違畏避蔡京也

閏月立周恭帝後

詔周柴氏後已封崇義公復立恭帝後以為宣義郎監周陵廟世世為國三恪

冬十二月置裕民局尋罷之○遼大饑人相食

發明

凡外災告則書不曰饑而曰大饑言甚也人相食則尤甚耳遼既罹兵難重以饑饉則其

業亦殆矣遼之窮迫從可知焉自古天子有救災卹鄰之義宋未救卹反欲攻之豈不悖哉綱目特

書于冊所以志遼亡國之本

己亥宣和元年春正月詔更寺院為宮觀

林靈素欲盡廢釋氏以逞前憾請於帝改佛號大覺金仙餘為仙人道士僧為德士易服飾稱姓氏寺為宮院為觀改女冠為女道士為女德士並許入道學依道士之法

癸明

前書以林靈素為通真達靈先生此書詔更寺院為宮觀則其崇尚異端特有好惡偏私

之異耳非灼然明達不惑者也綱目特揭而大書之則是非得失瞭然見矣

廣義

嗚呼佛老之害人國也尚矣徽宗之世佛老盛行而老氏之學尤為極盛今觀綱目具載

于以見林靈素肆意妄行絕無忌憚改僧名易寺院欲更即更無不如意徽宗乃其掌中之物徒擁虛器而已汴宋淪夷豈無自哉

金人來聘遣馬政報之不至而復

金主與尼瑪哈議遣渤海人李善慶女真索多持國書并北珠生金等物同馬政來脩好詔蔡京等諭以夾攻遼之意善慶等唯居十餘日遣政同趙有開齋詔及禮物與善慶等渡海報聘行至登州有開死會諜者言遼已封金主為帝乃詔政勿行止遣平海軍校呼慶送善慶等歸金金主遣慶歸且語之曰歸

見皇帝果欲結好早示國書若仍用詔決難行也。初高麗來求醫帝命二醫往至是歸奏云高麗館醫甚勤日夕引之視其用兵布陣禦敵之方曰聞天子將與女真圖契丹苟存契丹猶足為中國捍邊女真乃強敵不可交也宜早為之備帝聞之不樂

發明

金稱人進之也朝聘者中國諸侯之事雖外邦而能脩中國諸侯之事則不念其背遼不臣而遂進焉雖然金之來聘由宋先通之也夏禹修德萬國來朝周公行政重譯來獻然當是時未聞禹周先通而後來之也徽宗善結強敵以速土崩其志亦憊矣變文而書來聘者猶為中國諱之焉耳綱目揭而書之則興亡之機識者可以觀焉宜乎有以來高麗之諫也

以余深為太宰王黼為少宰

黼賜第城西日導以教坊樂供張什器悉取於官寵
傾一時是時朝廷已納趙良嗣之計將會金以圖燕
會謀云遼主有亡國之相黼薦畫學士陳堯臣使遼
堯臣繪遼主像以歸言於帝曰遼主望之不似人君
若以相法言之亡在旦夕幸速進兵兼弱攻昧此其
時也并圖其山川險易以上帝大喜取燕雲之計遂
決

廣義

分注載王黼薦畫學士陳堯臣使遼繪遼主
像以歸言於帝曰遼主望之不似人君若以

相法言之亡在旦夕幸速進兵兼弱攻昧此其時
也帝大喜取燕雲之計遂決嗚呼武王興王之業
十有八九商紂亡國之勢十有七八武王師臨牧
野尚曰同力度德同德度義惟以德義為主其他
非所先也宋之興遼跡其立國之初各逐其鹿亦
非有不共戴天之讐特以澶淵一事為之介介耳

今而一聽細人之言遂定取燕雲之策果何德何義哉彼天祚荒淫不道固有亡國之勢初不繫於相也昔煬帝自稱好脰頸終斫於宇文化及之手臣觀宋史載徽宗縱逸樂好奢侈必其儀容俊雅其相優於遼主也多矣然而後世論亡國之君者莫不以徽宗為首稱何哉德義不脩而料敵之失也故

占城入貢

占城在中國西南東至海西至雲南南至真臘一月程西北至交州四十日所統大小聚落一百五大畧如州縣自上世未嘗通上國周顯德中始入貢其後朝貢不絕然與交州相近互相侵擾焉至是封為王始與交趾加恩均矣

二月以鄧洵武為少保○三月以馮熙載為中書侍郎
范致虛張邦昌為尚書左右丞

發明

徽宗之世政出權姦觀其所用之人所行之
事無一善之可取欲其不亂蓋亦難矣故綱

目特揭其執政之臣而歷
書之所以著宋肇亂之本

○遼遣使冊金阿古達為東懷國皇帝阿古達不受

遼遣耶律努克如金議和金主復書曰能以兄事朕
歲貢方物歸我中京上京興中府三路州縣以親王
公主駙馬大臣子孫為質還我行人及元給信符并
宋夏高麗往復書詔表牒則可既而努克至金使呼
圖克昆與俱如遼免取質子及上京興中府所屬州
郡裁減歲幣之數且曰必以兄事我冊用漢儀方可

為約言如不從勿復遣使遼主從之凡七遣使如金
議冊禮金乃使烏凌阿贊謨如遼迎封冊冊至金
主以無兄事之語又不稱大金而東懷乃小邦懷其
德之義語涉輕侮乃復使贊謨如遼責其冊乖體式
如依前書所
定然後可從

廣義

遼人不道金人朵顏其鼎也久矣然其求封
冊迎封冊皆偽也遼人不察乎此反以東懷

國皇帝冊之金人之意以為若是者則處我於一
附庸也然且謂之懷者懷遼之義也遼主既以皇
帝之名自居又以之冊金則是非不知天無二日
民無二王也特畏其強而不得不以是冊之耳曰
然則綱目於金主何以名
之邪曰君前臣名之義也

劉法及夏人戰於統安城敗走夏人追殺之

童貫使劉法取朔方法不欲行彊遣之乃引兵二萬
出至統安城遇夏主弟察克率步騎為三陣以當法
前軍而別遣精騎登山出其後大戰移七時兵饑馬
渴死者甚衆法乘夜遁比明走七十里至蓋朱峴守
兵追之斬首而去貫隱其敗而以捷聞察克見法首
惻然語其下曰劉將軍前敗我於古庫勒日木多泉
吾避其鋒謂天生神將豈料今為一小卒梟首哉其
失在恃勝輕出不可不戒遂乘勝圍震武震武在山
峽中熙秦兩路不能餉自築城三歲知軍李明孟清
皆為夏人所殺至是城又將陷察克曰勿破此城留
作南朝病塊
乃自引去

發明

內書及則主是戰者劉法而曲在內矣不曰
敗績而曰敗走貶絕之詞也追者已去而躡

之之謂劉法擅起邊釁兵連禍結其罪已甚故書
夏人追殺易於匹夫然者所以罪其既率大軍不

能死敵而先為苟免之計焉耳不然何以不書死之而書殺之耶觀綱目之所書則其貴義不貴功之意隱然見於書法之間矣

廣義

童貫敗軍而無敢言者畏貫之兇馘也嗚呼徽宗倒持太阿而授之於貫其不斷指裂膚

者幾希矣

夏四月朔日食○五月京師大水

京師茶肆傭晨興見犬犬蹲榻傍近視之則龍也軍器作坊兵士取而食之逾五日大雨如注歷七日而止京城外水高十餘丈帝懼甚命戶部侍郎唐恪決水下流入五丈河起居郎李綱言國家都汴百五十餘年矣未嘗有此異夫變不虛生必有感召之災非易禦必有消復之望求直言采而用之以答天戒詔

貶綱一官
與縣去

發明

日者衆陽之宗水者陰沴之發蓋日為陽而水為陰京師為陽而四方為陰君上為陽而

臣下為陰今而日食大水則是陽淑消而陰慝長推原其義乃君道之虧而強敵小人竊發之機也善乎李綱曰變不虛生必有感召之災非易禦必有消復之當時視為泛常畧無戒懼然則玩安忽危未有甚於徽宗者也天變曷從而弭哉後之有天下之責者可不致謹於斯

廣義

飛龍在天豈有蹲榻之理然而俄致大水之異者此強臣敵國禍亂之徵也可不戒哉

六月夏人來詔童貫罷兵秋七月以貫為太傅

闕右既困童貫諷夏人因遼進誓表納款遂詔六路罷兵及夏遣使來賀天寧節授以誓詔夏使辭不取

貫不能屈但追館伴彊之使持還及境棄之道中而去貫炎得而上之貫始大沮尋加貫太傅封涇國公時人稱蔡京為公相貫為媼相

發明

直書曰來不予其朝也夏人之來初非心服持因關右既困童貫諷之故耳及授詔書夏

使不肯持還及境棄之道中而為敵人輕侮如此則宋之不競從可知矣然太傅三公之職童貫何人而可當之乎矧兵連禍結迄無成功不能加誅而反行賞謂之何哉以至貴之爵授刑餘之人則是徽宗知有私恩而不知有名器也厥後女真入境童貫逃回則貫之才畧亦可想見矣比而觀之其義自見

廣義

刑餘奴隸之賤既處以師傅之尊復列以上公之爵不知臣贊治化與夫開國元勳將何

以處之邪鳴呼徽宗昏庸若此
宜其不死社稷而甘心受辱焉

八月范致虛罷

時朝廷欲用師契丹致虛言邊隙一開必
有意外之患宰相謂其懷異會母喪去位

金製女真字

女真初無文字及獲契丹漢人始通契丹漢字金主
遂命古紉依倣漢人楷字因契丹字制度合本國語
製女真字行之後復製女真
小字謂古紉所製為大字云

九月幸蔡京第

帝幸道德院觀金芝遂幸蔡京第時京子攸儵脩及
攸子行皆為大學士儵尚帝女茂德帝姬家人廝養

亦居大官媵妾封夫人京每侍上恒以君臣相悅為
言帝時乘輕車小輦頻幸其第命坐傳觴畧用家人
禮京謝表有云主婦上壽請酬而肯
從雅子牽衣挽留而不却蓋實事也

發明

按劉氏書法凡書君入諸臣之家皆譏詞也
天子深居九重罔敢輕出况蔡京姦險柔佞

小人豈有謀焉則就之禮乎厥後遊幸無度往來
市廛卒無忌憚馴至大亂而後已是故徽宗之放
肆蔡京有以啟之也蔡京之恣橫徽宗有以成之
也然則有天下者詎可不知所警哉直書幸第深
醜之也

加蔡攸開府儀同三司

攸有寵於帝進見無時與王黼得預宮中秘戲或侍
曲宴則攸黼着短衫窄袴塗抹青紅雜倡優侏儒中

多道市井淫媒謔浪語以戲笑取悅攸妻宋氏出入禁掖攸子行領殿中監寵信傾其父攸嘗言於帝曰所謂人主當以四海為家太平為娛歲月能幾何豈徒自勞苦帝深納之因令苑囿皆倣江浙為白屋不施五采多為村居野店及聚珍禽異獸動數千百以實其中都下每秋風夜靜禽獸之聲四徹宛若山林陂澤之間識者以為不祥之兆

冬十月頒紹述熙豐政事書於天下○十一月以張邦昌王安中為尚書左右丞

安中附童貫王黼為中丞因論蔡京罪為帝所知遂居政府

十二月帝數微行竄秘書省正字曹輔於郴州

帝自政和以來多微行始民間猶未知及蔡京謝表輕車小輦七賜臨幸自是邸報傳之四方而臣僚阿順莫敢言曹輔上疏諫曰陛下厭居法宮時乘小輦出入廛陌郊坰極遊樂而後返臣不意陛下當宗社付託之重玩安忽危一至於此夫君之與民本以人合合則為腹心離則為楚越畔服之際在於斯須甚可畏也萬一當乘輿不戒之初一夫不逞包藏禍心雖神靈垂護然亦損威傷重矣又況有臣子不忍言者可不戒哉帝得疏出示宰臣令赴都堂審問余深曰輔小官何敢論大事輔曰大官不言故小官言之王黼陽顧張邦昌王安中曰有是事乎皆應以不知輔曰茲事雖里巷小民無不知相公當國獨不知邪曾此不知焉用彼相黼怒令吏從輔受詞輔操筆曰區區之心一無所求愛君而已退待罪於家黼奏不重責輔無以息浮言遂編管郴州初輔將有言知必獲罪名子紳來付以家事乃閉戶草疏及貶怡然就

道

發明

微行者匹夫之事自漢武微行而宋太祖效之太祖微行而徽宗又效之不惟行而曰數

甚言其無節也蓋貴為天子富有四海其出則警其入則蹕戒不虞也今乃輕車小輦浪遊塵陌間遇不測其及救乎秘書正字官之卑者尚能力諫其非當時之羣臣誠有愧耳而余深王黼之徒方且曲為辨說竄逐郴州小人之蒙蔽其君有如是哉荀卿曰忠信而不諛諫諍而不諂矯然剛折端立而無傾側之心曹輔近之矣然綱目上書帝數微行下書竄曹輔則其義為可見

廣義

曹輔忠君愛國而反蒙竄逐則徽宗之縱欲拒諫其與楊廣陳叔寶一轍矣不亡得乎

召楊時為秘書郎

時南劍將樂人初舉進士第聞程顥兄弟講孔孟絕學於河洛調官不赴以師禮見顥於潁昌相得甚歡其歸也顥目送之曰吾道南矣及顥卒又師事程顥於洛蓋年四十矣一日顥偶瞑坐時與游酢侍立不去顥既覺則門外雪深一尺矣後歷知瀏陽餘杭蕭山三縣皆有惠政民思之不忘時安於州縣未嘗求聞達而德望日重四方之士不遠千里從之游號曰龜山先生會蔡京客張觥言於京曰今天下多故事至此必敗宜亟引舊德老成置諸左右庶幾猶可及京問其人觥以時對京因薦之會路允迪自高麗還言高麗國王問龜山先生安在乃召為秘書郎

發明

自立黨禁小人盈朝天下否矣蔡京因張觥之言遂薦楊時召為館閣是蓋天理民彝隨

處發見不終泯沒云爾使其奮革前習鼎新事業悉訪賢才與之共政則天下容或未亂也惜乎徒

能召時而不改故轍可勝憾哉
綱目書此亦所以不沒其善

廣義

龜山碩德重望英才正學雖夷裔之國尚尊慕之況中土邪夫何徽宗昧於求賢溺於私

昵衆賢在野羣小滿朝今者一得龜山即當置諸左右如尹如說則太甲高宗之事業不難矣既名曰召止以為郎惜哉且蔡京之於賢人君子非不知不好也特以利欲之私蔽固已深雖有賢聖在焉譬諸泰山峙目雷電轟耳而亦不見不聞也今而直抵無可奈何之地始以龜山為薦此可見小人之於天理未嘗有所泯滅也吁使龜山為郎固無所損使其為相亦無所益而宋之宗社幸與不幸寔在於賢人君子之用與不用何如耳有天下者可不戒哉

庚子二年春正月罷道學○林靈素有罪放歸田里

靈素初與道士王允誠共為神怪之事後忌其相軋毒殺允誠遂專用事及都城水帝遣靈素厭勝方步虛城上役夫爭舉挺將擊之走而免帝始厭之然橫恣愈不悛道過皇太子弗斂避太子入訴於帝帝怒以靈素為太虛大夫斥還故里命江端本通判温州察之端本廉得其居處過制罪詔徙置楚州命下而靈素已死遺奏至猶以侍從禮葬焉

發明

靈素奸偽小人既號以通真達靈先生又寵錫無比蓋亦可愧之甚矣及其道遇太子亦

弗斂避乃始貶之不亦晚乎夫小人不不足道也其如國法何哉書曰有罪放歸田里所以著徽宗之失而非予其能罰有罪也然帝於方士始雖為其所罔及陷於罪則亦往往取而罰之如王仔昔林靈素之類皆在所不赦是又帝之明斷也嗚呼茲其所以不沒其善也歟使推是心以治京黼則亦

何往而不善哉惜乎尚
明於他而獨暗於此耳

廣義

異端之害雖曰易以惑人實係乎時若世主之賢否也今焉無他事而遽罷之者必其見

侮於靈素多矣徽宗似難以語人者也故分注載靈素益肆橫恣道遇皇太子弗斂避太子訐於帝帝怒以靈素斥還故里其意蓋可見矣嗚呼靈素肆侮於宋也甚矣雖使厥軀寸斬邪徒殛死猶不足以及謝天下今其死也反以禮葬則不惟失討賊之義而適以遂賊之計矣惜哉

二月遣趙良嗣使金

先是呼慶自金還具道金主言并持其書來請別遣使時童貫密受旨圖燕因建議遣右文殿脩撰趙良嗣往仍以市馬為名其實約攻遼以取燕雲之地

○三月遼復遣使如金議冊禮金不許

先是遼遣蕭實訥持冊藁如金金遣烏凌阿贊謨持冊副本報遼遼以金所定大聖二字與先世稱號同遣實訥持往議金主怒謂其臣曰遼人屢敗遣使求成惟飾虛詞以為緩師之計當議進兵乃令咸州路統軍司治軍旅脩器械將以四月進師令色克留兵一千鎮守棟摩以餘兵來會於渾河和議遂絕

廣義

臣前所謂金之求冊者偽也今果以之而絕和議焉金人之計如是而遼人其可當乎

夏五月金侵遼上京留守耶律托卜嘉以城降

金主自將攻遼以遼使蕭實訥持宋使趙良嗣從遣降者馬乙持詔諭城中使速降遼主獵於呼圖哩巴山間金舉兵命耶律拜薩巴等選精兵三千以濟師五月金主進攻且謂實訥持趙良嗣曰汝可觀吾用

兵以下去就遂臨城督戰諸軍鼓噪而進自旦及巳
棟摩以麾下先登克其外城留守托卜嘉以城降良
嗣等奉觴為壽皆
稱萬歲金主乃還

發明

潛師入境曰侵凡降讖也以城降甚讖之說
苑曰食其食者死其事受其祿者卑其能托

卜嘉為遼內族受命留守城非不堅兵非不多弗
克死守而乃迎降其罪甚矣故大書曰以城降則
見其上京之兵足以拒敵而托卜嘉偷生苟免則
非力屈而降者比矣綱目書此以為後世人臣不
忠之戒耳於托
卜嘉乎何誅

六月詔蔡京致仕

京專政日久公論益不與帝亦厭薄之子攸權勢既
與父相軋浮薄者復間焉由是父子各立門戶遂為

仇敵攸別居賜第一日詣京京正與客語使避之攸甫入遽起握父手為珍視狀曰大人脉勢舒緩體中得無有不適乎京曰無之攸曰禁中方有公事即辭去客竊窺見以問京京曰君固不解此邪此兒欲以為吾疾而罷我耳閱數日果以太師魯國公致仕仍朝朔望

發明

凡書致仕予知止也此予之歟曰非也致仕者人臣知止之稱詔其致仕則非知止者焉

分注言京專政日久公論不與帝亦厭薄况父子各立門戶遂為仇敵則是君臣父子之間慙德多矣語曰君不君臣不臣父不父子雖有粟吾得而食諸三綱既絕彝倫亦廢雖祿之以天下不能一朝居也惡在其能經綸天下宰正百官者哉直書詔致仕則貪位慕祿者春春不舍之意可見矣

廣義

觀分注備載蔡京致仕之由其逆理違天莫有過於蔡京父子也今焉蔡京之子既叛其

父京獨不叛其君邪昔齊景公問政於孔子孔子曰君君臣臣父父子子曰善哉信如君不君臣不臣父不父子不子雖有粟吾得而食諸故後世莫不賢景公者以其篤信聖言而為政事之根本也今蔡京得君如此之專行乎惡政如彼其久攸為親子尚不能處而致其叛逆如此其於君臣也何有哉徽宗不此之察而被其蠱惑是猶與豺狼同處而望其馴於我也其不為伊吞啗者幾希矣

復僧寺額

尋又復德士為僧

發明

徽宗惑於方士廢斥浮屠既而稍悟甫罪林靈素等即復僧寺額皆不顧理之是否惟務

相反而已綱目合而書之識者可以觀矣

廣義

嗚呼異端之害莫過於僧與道也故有愈其穢汚而除之者一見於元魏再見於五代之

周由東漢以迄于今舍此而未聞如魏如周者焉故程子曰昔之入人也乘其迷暗今之入人也因其高明不其諒哉綱目前書罷道學放靈素君子幸焉未幾而遂復僧寺額者譬諸一盜出而一盜入也然欲保其貨貨之不失者難矣哉宋室不競良可惜耳

秋八月金人來議攻遼及歲幣遣馬政報之

趙良嗣謂金主曰燕本漢地欲夾攻遼使金取中京大定府宋取燕京析津府金主許之遂議歲幣金主因以手札付良嗣約金兵自平地松林趨古北口宋兵自白溝夾攻不然不能從因遣貝勒偕良嗣還以致其言帝使馬政報聘書云大宋皇帝致書于大金皇帝遠承示書致罰契丹當如來約已差童貫勒兵

相應彼此兵不得過
關歲幣之數同于遼

發明

敵人無厭之求至是見矣其初議攻遼必及歲幣則異時覬覦之心詎可遏乎明哲之君

熟思審處察其來意必善絕之以防憑陵之患可也惜乎徽宗利人土地駸駸無已不顧禮義屈已要盟豈不深可嘆哉是故謹始慮終謀國之善策作事謀始應變之良規徽宗之通金由其不能謀始所以未免慮終觀綱目之所書可以占宋事之隆替矣

廣義

分注載徽宗致書于大金皇帝約共攻遼及許歲幣與遼同者嗚呼宋殤公不能正衛人

之罪而反糾之以伐無罪之鄭春秋惡之況遼素通好於宋無罪可伐金為遼之屬國乃叛君者耳金可伐而遼不可伐也明矣今反助之而與攻遼何哉畏其強而俛首聽命焉耳正藝祖所謂吾平

生不欺善怕惡今其嗣孫乃怕惡欺善者也藝祖
曷得不興而嗣孫曷得不亡乎及許歲幣與遼同
者是以踵弱國之末算其志不亦卑乎嗚呼漢以
金繒奉匈奴賈傳薄之慮患深也他日金人愈肆
其強指以歲幣為口實而索燕雲之租稅者此其
驗也曰然則事已如此為徽宗計者奈何曰遼雖
弱而不可攻金雖強而不能伐惟當致書絕皇帝
之辭交鄰無歲幣之許內脩德政外輯邊疆禮賢
士用良將俟其有過然後傳詔天下徐興問罪之
師蔑不勝矣何金之可畏哉若曰金果脩德而如
湯如武我誠有所不逮必如孟子所謂鑿池築城
與民守之是也舍此而求他計末之難矣抑觀徽
宗此舉其失有三助強鄰而伐無罪之國不仁也
敵人而與之盟不義也許夷人以歲幣不智也失
此三者國本搖
矣可不慮哉

以余深為少傅○冬十月朔日食○加內侍梁師成太尉

師成黠慧習文法初領睿思殿文字外庫主出外傳上旨政和中漸得幸因竄名進士籍中累遷至河東節度使遂加太尉時帝留意禮文符瑞之事師成善逢迎希恩寵帝命處殿中凡御書號令皆出其手多擇善書吏習倣帝書雜詔旨以出外庭莫能辨師成實不能文而高自標榜自言蘇軾出于外庭莫能辨師成蘇文其尺牘在人間者皆毀去師成訴于帝曰先臣何罪自是軾之文乃稍出以翰墨為已任四方雋秀名士必招致門下往往遭黜污多置書畫卷軸于外舍邀賓客縱觀得其題識合意者輒密加汲引執政侍從可階而升王黼以父事之稱為恩府先生蔡京父子亦諂附焉都人目為隱相所領職局至數十百

階至開府儀同三司布衣朱夢說上
書論官寺權太重詔編管于池州

發明

凡書加不當加也太尉三公之職內侍刑餘
小人以三公之職加刑餘小人此徽宗所以

瀆亂名器也嗚呼宋室官者之禍相尋於無窮烏
得而不亂哉是時亂根尚在而代者已踵其後故
書加梁師成太尉則是一童貫未去一童貫已生
矣禍亂果何時而弭乎吁其與唐以程元振為驃
騎大將軍同意

廣義

觀分注載師成之事則知其黠慧無能出其
右者也不能書而竊御書以重其權不能文

而竊蘇文以鈞其譽彼徽宗特其
掌中之木偶耳其亦可笑也哉

睦州人方臘作亂

睦州清溪民方臘世居縣場村託左道以惑衆初唐
永徽中睦州女子陳碩真反自稱文佳皇帝故其地
相傳有天子基臘因得憑藉以自信縣境梓桐幫源
諸洞皆落山谷幽險處民物繁夥有漆楮杉材之饒
富商巨賈多往來臘有漆園造作局屢酷取之臘怨
而未敢發時吳中困於朱勔花石之擾比屋致怨太
學生鄧蕭進詩諷諫帝不聽放蕭歸田里勔益橫臘
因民不忍隱聚貧乏遊手之徒以朱勔為名起作亂
自號聖公建元永樂置官吏將帥以巾飾為別自紅
巾而上凡六等無弓矢介冑惟以鬼神詭秘事相扇
誅焚室廬掠金帛子女誘脇良民為兵人安于太平
不識金革聞金鼓聲即斂手聽命不旬日衆衆至數
萬兩浙都監蔡遵顏坦
擊之皆敗死于息坑

發明

嗚呼宋室自此亂矣方臘作亂自往年萌孽
至是始書于策臘雖破滅而宋江金人侵伐

之謀接踵而起宋遂不支僅以徽欽昏淫相繼為亡宋之主則方臘之亂實起於重和初年是時徽宗失德既形禍已若此然則逆氣所鍾妖孽乘之尚復何說之有哉不書陷睦歙杭州陷婺處州陷衢州寇秀州如入無人之境然則花石之害民其流之弊至是甚矣識者可以察之後之有天下者可不戒諸

廣義

分注載朱勔花石之擾比屋致怨臘因民不忍聚眾為亂嗚呼君而非民則誰與守邦民

而非君則何所奉戴是知君民一體可相有而不相無者也民可恃乎哉歷觀往古得窺神器者何莫不自因民不忍中來耶是故后羿因民不忍而得距太康于河此五子之所以悲也自時厥后成湯因夏民不忍而桀有南巢之放武王因商民不忍而紂有牧野之誅漢高因民不忍而嬴氏以

亡光武因民不忍而新莽以滅民不忍於陳后主之侈而楊堅興於隋民不忍於隋煬帝之驕而世民王於唐今徽宗之民不忍於朱勔故方臘得以因之也但臘以下愚之見而不能成弔伐之舉耳且諫君之道其來尚矣堯舜大禹聖人也亦有都兪吁咈勸戒之辭迨至湯武從諫如流而商周以興桀紂拒諫飾非夏商以亡漢魏以下其興其亡無不然矣彼鄧蕭以詩諷諫深得古人之意所謂吟咏性情以諷其上言之者不可罪聞之者足以戒是也故康公慢賢而權輿是作陳佗無良而墓門以興他如簡兮之諷衛侯巧言之刺幽王是皆臣子愛君之意此所以見取於聖人也由是知諷諫者古人之遺意罪諫者國君之不祥今鄧肅朝進諷諫之詩幕承放歸之詔于以見徽宗拒諫之心素所橫于胸中雖以陳司諫之落裾尚遭其貶况肅之無官守者邪綱目備載于分注所以著徽

宗罪諫之惡而識其亡國之大端也

十一月余深罷

時福建以取花果擾民深為言之帝不悅出知福州

以王黼為少保太宰

初蔡京致仕黼陽順人心悉反其所為四方翕然稱為賢相及拜太宰遂乘高為邪多蓄子女玉帛自奉僭擬禁省稍襲京迹

十二月方臘陷睦歙杭州詔以童貫為江淮荆浙宣撫使發兵討之

臘攻陷青溪遂陷睦歙州東南將郭師中戰死遂北掠桐廬富陽諸縣進逼杭州郡守趙震棄城走州即陷殺制置使陳建廉訪使趙約縱火六日死者不可勝計凡得官吏必斷鬻支體探其肺腸或熬以膏油叢鏑亂射備盡楚毒以償怨心警奏至京師時方聚兵以圖北伐王黼匿不以聞於是凶焰日熾附者益衆東南大震淮南發運使陳邁上言臘衆彊東南兵弱乞調京畿兵及鼎澧槍牌手兼程以來使不至滋蔓帝得疏始大驚乃罷北伐之議而以童貫為宣撫使譚稹為兩浙制置使率禁旅及秦晉番漢兵十五萬討之

真臘入貢

真臘在占城南地方七千里政和中始通中國至是遣郎將來朝詔封其主金哀賓深為國王恩比占城

辛
丑 三年春正月鄧洵武卒

鄧氏自綰以來世濟其奸而洵武阿蔡京尤甚京之收亂天下禍源自洵武始

童貫承詔罷蘇杭應奉局花石綱

初帝以東南之事付童貫且曰如有急即以御筆行之貫至吳見民困花石之擾衆言賊不亟乎坐此耳貫即命其僚董耘作手詔罪已罷諸應奉造作局及御前花石綱運并木石彩色等場務而帝亦黜朱勔父子弟姪之在職者吳民大悅

發明

盜不自發必有激之而發者妖不妄作必有感之而作者是時應奉花石之事害民深矣

使老弱轉乎溝壑壯者散于四方無恒產者無恒心苟無恒心放僻邪侈無不為矣故方臘一呼遠

近響應無恒心焉耳童貫既知花石之害即作手詔罷之由是吳民大悅賊亦甫平可見民心之與天命相合而不相離不得乎此則失乎彼必然之理也徽宗茲因小警益脩厥德省浮費斥小人求實政用賢才豈不為有宋守文之主哉惜其盜賊甫滅而應奉復舉花石復用日積月累民怨愈深所以淪於危亡而不悟也綱目特書亦以嘉其自新之念耳

方臘陷婺州又陷衢州

衢守彭汝方被執罵賊而死賊屠其城

二月罷方田○罷州縣學三舍法

省宗學辟雍諸路提舉學士官

方臘陷處州。淮南盜宋江掠京東諸郡。知海州張叔夜擊降之。

宋江起為盜。以三十六人橫行河朔。轉掠十郡。官軍莫敢嬰其鋒。知亳州侯蒙上書言。江才必有過人者。不若赦之。使討方臘。以自贖。帝命蒙知東平府。未赴而卒。又命張叔夜知海州。江將至海州。叔夜使間者覘所向。江徑趨海濱。刼鉅舟十餘。載鹵獲。叔夜募死士得千人。設伏近城。而出輕兵距海。誘之戰。先匿壯卒海旁。伺兵合。舉火焚其舟。賊聞之皆無鬪志。伏兵乘之。擒其副賊。江乃降。

發明

方臘未降。宋江復起。蓋由積不善。必有餘殃。者已。徽宗恣行逆德。天下之亂。其奈何哉。人

君視此。可少警矣。綱目備書于冊。所以著其亂亡之漸也。噫。

方臘寇秀州官軍敗之

臘將方七佛引衆六萬攻秀州統軍王子武乘城固守已而大軍至合擊賊斬首九千賊還據杭州

遼都統耶律伊都叛降金

遼主四子長趙王實訥埒次晉王額魯溫次秦王定次許王寧晉王文妃蕭氏所生積有人望女真興兵境內郡縣所失幾半而遼主畋遊不恤忠臣多被疎斥文妃作歌諷諫遼主銜之樞密使蕭奉先元妃之兄而秦許王之舅也以國人屬意晉王恐秦王不得立因潛圖之文妃姊適耶律達哈拉妹適耶律伊都一日其姊若妹俱會軍前奉先諷人誣文妃與駙馬蕭昱及伊都達哈拉等謀立晉王而尊遼主為太上皇遼主遂誅蕭昱達哈拉等而賜文妃死伊都在軍中聞之大懼即率千餘騎叛降于金遼主遣蕭錫默

等將兵追之及諸閭山縣錫默等謀曰主上信蕭奉先奉先視吾輩蔑如也伊都乃宗室豪俊常不肯為即給曰追不及伊都至金金主見之因詔咸州都統司曰自伊都來灼見遼國事宜已決議親征其治軍以俟師期

發明

人臣之事君義而已矣故於豐亨之時君有過則犯顏諫諍蹇難之時君有急則仗節死

義程子曰成就一箇是此之謂也伊都既為都統則非卑末之可比既為宗室則非異姓之可倫當國家厄運之秋正臣子憂勤之日雖搆以讒邪弗克暴白亦當奉詞討賊辨析是非必不得已死之可也夫何忘君背國忍耻事讐其惡可勝言哉特書叛降所以著其不赦之罪也綱目之脩誅亂討逆而已耳

廣義

仲虺之告成湯曰德日新萬邦惟懷志自滿九族乃離今觀綱目所書則知遼主于時正

九族乃離之日也何以言之文妃遼主之敵體也遽信讒而見殺晉王遼主之賢子也又有意而殺之伊都遼主之親戚也一旦棄之以資敵國遼主不惟荒淫而又剛暴何足道哉曰然則綱目於耶律伊都何以書官而書其叛降哉蓋具官者所以著其為遼之臣書叛降者所以律其臣叛君也遼主雖曰不君而在伊都則有甚不可焉者耳噫遼主自伐其國若此尚何以不伐而望金人哉

夏四月童貫合兵擊方臘破之執臘以歸

二月童貫譚稹前鋒至青河堰水陸並進臘復焚官舍府庫民居乃宵遁還清溪幫源洞諸將劉延慶王稟王渙楊惟忠辛興宗王淵等相繼至盡復所陷城四月貫等合兵擊臘于幫源洞臘衆尚二十萬與官

軍力戰而敗深據巖屋為三窟諸將莫知所入王淵
裨將韓世忠潛行溪谷問野婦得徑即挺身仗戈直
前擣其穴格殺數千人擒臘以出辛興宗領兵截洞
口掠為已功併取臘妻子及偽相方肥等五十二人
於峒石穴中殺賊七萬餘人其黨皆潰臘之亂凡破
六州五十二縣戕平民二百萬所掠婦女自賊洞逃
出裸而縊于林中
者相望百餘里

五月以鄭居中領樞密院事○大蝗

廣義

蝗蝻屬春秋書之記災異也人所致者曰災
大蝗大災也程子曰民以食為命故有災必

書之于時徽宗闇弱京貫奸貪凡百所為皆殃民
之事曰然則天何為而先肆毒於民邪曰食者民
之命民者國之本故凡災由人致而異出於天人
君自致其災如此則是絕民之命而喪其本矣本

既喪矣國豈能存此理之
決然者也果何係於天哉

○安置御史中丞陳過庭于黃州

過庭以睦寇竊發嘗上言致寇者蔡京養寇者王黼
竄二人則寇自平又言朱勔父子本刑餘小人交結
權近竊取名器罪惡盈積宜昭正典刑以謝天下三
人憾之至是陷以罪罷知蘄州未半道謫黃州安置

發明

楊氏曰堯之舍已從人舜之聞見一善上也
唐高祖從諫如轉圜太宗棄人使諫次也故

曰堯舜聖之隨高祖太宗賢之隨徽宗飾非拒諫
京黼阿諛苟隨以正人為讐隙視忠言為芒刺過
庭因進直言無辜罹罪則君臣之間貪淫樂禍粉
飾太平天下之亂於茲決矣故綱目以無罪例書
之也
深惜

廣義

夫有所為而為者私也無所為而為者公也過庭豈不知蔡京王黼朱勔權傾人主言出

而禍隨哉蓋以灼見三人將覆宋室特以其心有所不忍而為徽宗痛言之耳豈有所為而為者耶夫何不此之察反陷過庭于死地惜哉故綱目於過庭之謫不惟銜之而又地之者明其無罪也

閏月復置應奉司

方臘既平王黼言於帝曰士大夫懷姦弗悛抑損應奉妄為譏謗望特置應奉一司臣專總領庶杜姦謀從之仍令梁師成總領於內遂復諸應奉局奪發運漕輓之卒為用戶部不敢詰自是四方珍異之物充物二人之家而入尚方者纔什一

廣義

分注載方臘既平王黼言于帝曰士大夫懷奸弗悛抑損應奉妄為譏謗望特置應奉一

司臣專總領庶杜姦謀從之遂復諸應奉局嗚呼
方臘之起因民不忍于應奉局故其得以藉口而
荼毒生靈以舒平昔之積怨宿恨也於士大夫何
預焉今王黼閹知徽宗溺於玩好故其言一入而
應奉之局即復矣使徽宗聽士大夫之言如聽王
黼則災害不生而禍亂不作矣雖然王黼童貫皆
巨奸也觀此則黼罪又浮於貫矣吁徽宗聞縱欲
之言如魚得水訓志之言如水沃石不亡何待

秋七月廢新置州軍

夔峽廣南邊臣開納土之議建立軍州上蠹國用下
殫民財至是言者以為病乃廢純滋祥亨祺泰承播
思隆允孚十二州及熙寧遵
義二軍或為縣或為堡寨

黑青見于禁中

元豐末嘗有物大如席夜見寢殿上而神宗崩元符末又見哲宗崩至大觀間漸晝見政和以來大作每出若列屋摧倒之聲其形僅丈餘彷彿如龜黑氣蒙之不大不了氣之所及腥血四灑又或變人形或為驢晝夜出無時多在掖庭及內殿習以為常人亦不大怖又洛陽府畿內忽有物如人或如犬其色正黑不辨眉目始夜則掠小兒食之後雖白晝入人家為患所至喧然不安謂之黑漢有力者夜執鎗自衛亦有託以作惡者二年乃息

癸明

禎祥妖孽隨感而應善不善之積而已誠齋楊氏曰惟天愛君惟聖畏天天之於君厭之

者則驕之以嘉祥愛之者則譴之以災異絕之者則侈之以强盛念之者則懼之以災異徽宗窮極奢淫棄滅禮法以賢為不肖以不肖為賢土木大興兵戎妄作花石禽獸取自遐方聲色貨利充物

畿甸則其見絕於天災異之來必矣宮禁深嚴黑
青儵見民間喧哄易於皇惑此蓋乖戾之氣醞釀
而成也上書大蝗所以著民命之難全此書黑青
所以著天心之告戒即當時之故事觀之始可知
綱目書法之深意而人心天道之本然矣

廣義

按春秋傳異天之變也災人之害也一歲中
既有大蝗之災又有黑青之異災異迭興如
此正天怒民怨之時也徽宗方且罪諫官縱已欲
不畏天變不恤民隱雖欲不亡得乎孟子曰安其
危而利其菑樂其所
以亡者徽宗之謂也

八月加童貫太師封楚國公○方臘伏誅

改睦州為嚴州
歙州為徽州

廣義

漢世非軍功不侯故其末世子孫有封官者為侯君子惡之徽宗之於童貫殆有甚焉既

加以師傅之尊復錫以上公之爵何哉揆厥所由皆童貫邀功之所致也且方臘虔劉疆土戕害生靈誅之恨不早耳童貫於夏四月執方臘以歸即當致辟於獻俘之日今則濡滯逡巡直待加封然後正臘之罪謂非其邀功之奸計可乎況太師國公人臣之極位而偏於乘輿者也故成王以宋公封微子而諄諄焉以偕偏為戒者正恐其覬覦之心潛滋暗長於隱微之中也設使貫心無厭又欲以等而上之者求封不知將何以昇之耶其與稱父母目門生者無異矣厥後昏德之號誰其尸之

九月以王黼為少傅鄭居中為少師○詔宦者李彥括

民田于京東西路

初胥吏杜公才獻策于內侍太傅楊戩立法索民田
契自甲之乙乙之內展轉究尋至無可證則度地所
出增立賦稅始于汝州浸淫于京東西淮西北括廢
堤棄堰荒山退灘皆勒民主佃額一定後雖衝蕩回
復不可減一邑率於常賦外增租錢至十餘萬緡水
旱蠲稅此不得免擢公才為觀察使至是戩死以內
侍李彥繼之彥狠愎密與王黼表裏置局汝州臨事
愈劇凡民間美田使他入投牒告陳皆指為天荒雖
執印券皆不省魯山閻縣盡括為公田訴者輒加威
刑致死者千萬京西提舉官及京東州縣吏皆助彥
為虐民不勝忿痛發物供奉大抵類朱勔責辦于民
無休息期農不得之田牛不得耕墾殫財靡芻力竭
餓死或自縊輟輒間如龍鱗薜荔一本輦致之費踰
百萬喜賞怒刑禍福轉手因之得美官者甚衆前執
政冠帶操笏迎謁彥馬首彥處之自如所至倨坐堂
上監司郡守不敢抗禮有言于帝梁師成適在旁抗

聲曰王人雖微序於諸侯之上
豈足為過言者懼不敢復言

發明

王者以四海為家以天下為度天之立君所以為民君之得民所以守國民富則君不至

於獨貧民貧則君不能以獨富是故省刑罰薄稅
斂以足民之食節財用省浮費以寬民之力蓋君
之所畏者天所寶者民徽宗災異迭見而不悟是
乃不畏乎天也虐政繼作而不息是乃不寶乎民
也民心既畔天命亦離雖有天下烏可以一朝居
哉矧民田衣食所資今而括之則是與民爭利而
貽害大矣要有堂堂天朝較利民間尚能君臨萬
國而父母斯民乎直書于冊所以著其荒縱昏庸
之失也

廣義

觀分注備載李彥括民田之事則知于時民
窮財盡矣善乎有若之告哀公曰百姓足君

孰與不足百姓不足君孰與足故曰民惟邦本固邦寧正陸宣公所謂財者民之心也傷其心是傷其本傷其本則枝幹凋瘁而根抵廢拔矣昔紂以民財而足於鹿臺故不待牧野之師而根抵先拔於鹿臺德宗以民財而足於瓊林故不待奉天之幸而根抵先拔於瓊林徽宗括民田于京東西路然亦不待如金之禍而根抵先拔於京東西路矣自古國之所以亡者未有不先民窮財盡而後及之也有國者烏可自傷其本而先拔其根抵歟

冬十月詔童貫復領陝西兩河宣撫使○十一月馮熙載罷○以張邦昌為中書侍郎王安中李邦彥為尚書左右丞

邦彥本銀工子也俊爽美風姿為文敏而工然生長閭閻習猥鄙事應對便捷善謳謔能蹴鞠每綴街市俚語為詞曲人爭傳之自號李浪子以善事中人爭薦譽之累擢翰林承旨進右丞

廣義

前詔宦者李彥括民田于京東西路是理財之非也今用張邦昌王安中李邦彥是用人之失也為國之道莫要於理財用人二者而已二者胥失則宋事日非蓋可知矣

金侵遼中京

初耶律伊都奔金金尼瑪哈言于金主曰遼主失德中外離心今乘其釁可襲取中京天時人事不可失也金主然之羣臣言時方寒金主不聽竟用尼瑪哈計以舍音都統內外諸軍普嘉努尼瑪哈幹布幹里雅布富勒呼副之耶律伊都為卿導以趨遼中京大定府

廣義

耶律伊都遼之親戚也分注載金以耶律伊都為鄉黨以趨遼中京大定府嗚呼遼主荒

淫不道豈特所謂親戚畔之者哉其即視君如寇讐者也敵情狠愎固不足道其為後世有國者之

鑑不亦痛

且切乎

壬寅

四年春正月以蔡攸為少保○金克遼中京遼耶律

延禧殺其子晉王額魯溫走雲中

金克中京遂下澤州遼主時獵于鴛鴦澤伊都引羅索奄至遼主憂甚樞密使蕭奉先曰伊都乃王子班之苗裔此來欲立甥晉王額魯溫耳若為社稷計不惜一子誅之可不戰而退會耶律薩巴等復謀立額魯溫事覺遼主召樞密使蕭德勤岱等議曰反者必以此兒為名若不除去何以獲安德勤岱唯唯遼主

乃遣人縊之或勸額嚕溫亡額嚕溫曰安忍為最爾
之軀而失臣子之節遂就死遼主素服三日耶律薩
巴等皆伏誅額嚕溫素有人望諸軍聞其死無不流
涕由是人心解體伊都引金兵逼遼主行宮遼主率
衛士五千餘騎自駕鶻鵝走
雲中遺傳國璽于桑乾河

發明

克者力勝之詞殺者殺無罪之詞延禧當國
祚傾危之時遊宴無度不恤國政固有可亡

之理然而祖宗土地不能死守惟務逃奔謂之何
哉晉王延禧之子人望所鍾頃因讒忌即縊殺之
噫其志亦陋矣意豈不曰晉王既有人望苟立為
君庶幾能保宗社少延契丹之祀顧非幸歟亟殺
嫡冢此何禮耶故特斥名而書
殺所以著其殘悖不明之罪也

廣義

觀分注備載遼人為金所敗之詳則知遼主
之竄身失國惟在偏聽蕭奉先一人耳蓋前

既聽奉先之譖而殺一賢妃後又聽奉先之譖而殺一賢子國人安得不解體而敵國安得不乘釁
戕傳曰辟則為天下
僇者其遼主之謂也

二月管勾太平觀陳瓘卒

或問游酢以當今可以濟世之人酢曰四海人才不能周知以所識知陳了翁其人也劉安世嘗因瓘病使人勉以醫藥自輔曰天下將有賴於公當力加保養以待時用至是卒于楚州

發明

瓘忠亮有守遭時擯棄客死楚州誠可惜也網目因其卒而特具今職者則其不滿當時

之意可見矣

三月金襲遼軍延禧走夾山

金尼瑪哈敗遼奚王于北安州拔其城遣古紳略近
地獲遼護衛實訥將知遼上下離心使人報舍音曰
遼主窮迫若失機會事難圖矣舍音意未決幹布勸
從之舍音乃出青嶺尼瑪哈出瓢嶺期會于羊城漂
遼主在雲中以金兵為憂蕭奉先猶言女真雖能攻
我上京終不能遠離巢穴及聞金師將出嶺西遼主
遂趨白水樂尼瑪哈以精兵六千襲之將近行營遼
主計不知所出遂乘輕騎入夾山始悟奉先之不忠
怒曰汝父子誤我至此誅汝何益恐軍心忿怒爾曹
避敵苟安禍必及我其勿從行奉先下馬哭拜而去
行未數里左右執其父子縛送金兵金人斬其長子
昂以奉先及其次子昱械送金主道遇遼軍奪以歸
並賜死蕭德勤依自
知不免亦絕食死

廣義

分注載遼主於事勢窮蹙之際猶不忍誅奉
先而遣之去已既去被左右縛送金兵金兵

械送金主道遇遼軍奪以歸國遼主不得已而賜之死者何哉蓋遼主之亡也亡於蕭奉先之一人耳其罪大惡極人人得而誅之今既悟其不忠而猶隱忍不底其罪者失討賊也欲其國之不亡得乎

遼燕京留守李處溫等以耶律淳稱帝遙廢其主延禧為湘陰王

遼主之走雲中留南府宰相張琳參知政事李處溫與淳守燕京處溫聞遼主入夾山命令不通即與族弟處能及子璵外假怨軍內結都統蕭幹謀立淳處溫邀張琳白其事琳曰攝政則可即真則不可處溫曰今日之事天意人心已定豈可易也琳不敢執遂與諸大臣耶律達實左企弓虞仲文曹義勇康公弼

集蕃漢百官諸軍詣淳府引唐靈武故事勸進淳不
許將出李璵持赭袍被之令百官拜舞山呼淳驚駭
再三辭不獲從之群臣上尊號曰天錫皇帝建元天
福以妻蕭氏為德妃妃晉賢女也加處溫守太尉張
琳守太師餘與謀者授官有差改怨軍為常勝軍軍
旅之事悉委達實遙降遼主為湘陰王遂據有燕雲
中及上京遼西之地遼主所有沙漠已北西南西北
路兩都招討府諸蕃族而已淳遣使來報免歲幣結
好亦遣使奉表于金乞為附庸金人不報耶律達實
者太祖八世孫通遼漢字善騎射登進士第累擢翰
林學士承旨遼謂翰林
為林牙故稱達實林牙

發明

按劉氏書法曰以稱帝何不宜稱者也帝王
所自立者也見以於人則不足以帝矣延禧

未嘗書主此書廢其主何正名分也處溫等奉命
留守耶律淳承旨監軍正宜號召豪傑北向爭衡

恢復故地奉迎乘輿必不得已死守燕京可也夫何貪圖榮利共行悖逆皆綱目之所深絕者故書稱帝以著其僭竊之罪書廢其主以著其叛亂之罪觀綱目之所書則其君臣之分明逆順之勢定而亂臣賊子始無所容於天地之間矣凡若此類微君子莫能脩之

廣義

婦呼觀遼國之亡也則知當時君臣父子夫

哉雖欲不亡其可得乎孟子曰人之所以異於禽獸者幾希夫虎狼猶父子也蜂蟻猶君臣也鵲鴿焉以兄弟睢鳩焉以夫婦是故生於天地間者未有外倫理而能獨立者也豈有君國子民而置倫理於不講哉故蒯輒拒父孔子惡之夷齊讓國孔子賢之今也淳雖遼主之叔以分言遼主君也淳則臣也平日不能如周公之訓成王今因家國顛覆遽爾稱帝建元降封其君證以李唐靈武故事

吾誰欺欺天乎且昔者明皇幸蜀肅宗即位靈武遙尊明皇為太上皇帝後世大儒猶曰肅宗即位靈武分明是篡況降封乎曰為淳計者奈何曰量力而動力能迎主歸國則迎不能則如張琳之計而為君死社稷則庶乎其可也

金克遼西京

金人攻西京大同府遼耿守忠救之尼瑪哈摩囉歡幹布等繼至尼瑪哈率麾下自其中衝擊使餘兵去馬從旁射之守忠大敗其衆殲焉西京西路州縣部族皆降金

詔童貫蔡攸等勒兵巡邊以應金

朝廷既與金約夾攻遼以復燕雲蔡京童貫主之熙河鈴轄趙隆當極言其不可貫曰君能共此當有殊

拜隆曰隆武夫豈敢干賞以敗祖宗二百年之好異時啟釁萬死不足謝責貫不悅鄭居中亦力諫不可謂京曰公為大臣不能守兩國盟約輒造事端誠非廟算京曰上厭歲幣五十萬故爾居中曰公獨不思漢世和我用兵之費乎使百萬生靈肝腦塗地公實為之由是議寢及金數敗遼兵童貫乃復乞舉兵居中又言不宜幸災而動待其自斃可也時睦寇初平帝亦悔於用兵王黼獨言曰中國與遼雖為兄弟之邦然百餘年間彼之所以開邊慢我者多矣且兼弱攻昧武之善經也今而不取燕雲女真即疆中原故地將不復為我有帝遂決意治兵黼於三省置經撫房專治邊事不關樞密括天下丁夫計口出算得錢六千二百萬緡以充用黼又遺童貫書曰太師若北行願盡死力會聞耶律淳自立乃以蔡攸副貫勒兵十五萬巡北邊以應金且招諭幽燕攸童驤不習事謂功業可唾手致入辭之曰二美嬪侍帝側攸指而

而請曰臣成功歸乞
以是賞帝笑而弗責

發明

老子曰佳兵者不祥之器夫兵猶火也不戢將自焚徽宗志在混一海宇用兵不已蓋自

政和五年伐西夏討諸夷之後凡八年間兵禍四起征調日繁凡見於綱目所書者皆可覆也一旦金人竊發大駕蒙塵幾亡社稷是果誰之咎哉此書勒兵巡邊以應金下書進兵擊遼敗績其為殷鑒豈不甚明人主觀此其亦知所自治而不以窮兵黷武為意乎

廣義

中國與敵人盟不能保其不渝蓋敵情貪悻稍不如意則必敗盟是故唐肅宗約我狄以

求援而我狄背其約德宗信我狄以與盟而我狄劫其盟蓋盟者出于事不獲已列國有盟春秋惡之况與強敵盟乎此聖人所以書隱公及戎盟于唐而必日之者甚其非義也今徽宗與金約夾攻

遼其與虞公假道之愚何異哉後之帝中國者慎勿刺漆以止渴養虎以貽患可也

夏四月金取遼東勝諸州獲阿蘇以歸

阿蘇至金金主杖而釋之

五月童貫進兵擊遼敗績退保雄州詔班師貶都統制种師道為右衛將軍致仕

貫至高陽關用知雄州和誚計降黃榜及旗述弔民伐罪之意且云若有豪傑能以燕京來獻者即除節度使遂命都統制种師道護諸將進兵師道諫曰今日之舉譬如盜入鄰家不能救又乘之而分其室焉無乃不可乎貫不聽分兵為兩道師道總東路兵趨白溝辛興宗總西路兵趨范村耶律淳聞之遣耶律

達實蕭幹禦之師道次白溝遼人譟而前師道前軍
統制楊可世敗績士卒多傷師道先令人持一巨挺
自防賴以不大敗退師雄州遼人追擊至於城下辛
興宗亦敗于范村帝聞兵敗而懼詔班師遼使來言
曰女真之侵本朝亦南朝之所甚惡也今射一時之
利棄百年之好結強大之鄰基他日之禍謂為得計
可乎救災恤鄰古今通義惟大國圖之貫不能對種
師道復請與之和貫不納而密劾師道助賊王黼怒
責授師道右
衛將軍致仕

發明

遼人未有可伐之罪故書擊而不書伐徽宗
以官人為制將雖舉朝力爭皆不之聽至是

果辱王師故書童貫擊遼敗績以罪之上書童貫
敗績下書貶种師道為右衛將軍致仕則是連坐
之人明矣夫童貫身為制將總率大兵失律誤國
謂宜亟誅以正王法而乃甫免刑誅即劾師道則

欽定四庫全書

御批歷代通鑑輯覽

卷十

十

是徽宗知有童貫而不知有國法也此事觀之其義自見

廣義

大抵行師貴乎名實相副而忌乎有名無實也名實相副者勝有名無實者敗此理之必

然者也何則商湯周武仁義之師名實相副者也宋襄成安仁義之師有名無實者也此商湯周武之所以勝而宋襄成安之所以敗歟今童貫用和說之計以聲吊伐之舉且云若有豪傑能以燕京來獻者即除節度使觀此則知宋之出師惟在欲得燕京耳惡在其為弔伐哉此所謂有其名而無其實者是也安能服豪傑之心問敵國之罪以求必勝乎昔者齊桓伐楚責其不貢包茅是也然曰昭王南征不返則非矣此所以來楚之傲辭而終不能成厥功也善乎老種有盜入鄰家之譬何其當哉況乎遼使之言雖出于一時之倉卒要亦公平正大之說此誠決汴宋將亡之確論也豈有堂

堂中國而為此不仁不義之舉而反欲取勝於人耶或曰師道之喻可謂善矣而其處已何如曰未善也曰曷為未善曰師道既以朝廷此舉為非則當角巾私第口不言兵可也何甘心於刑餘奴隸之節制乎有前所喻而不能退避是不能見幾明決也甘受貫之節制而不能破敵是其戰陳無勇也曰然則綱目於其貶何以書致仕乎曰正以使宋之此舉為非專在童貫而不由乎師道也曰使宋此舉為得而師道不能死敵何如曰律之而已

六月以王黼為少師○遼耶律淳死其妻蕭氏稱太后主國事李處溫伏誅

淳寢疾聞遼主傳檄天德雲內朔武應蔚等州合諸蕃精騎五萬約以八月入燕并遣人問勞索衣裘茗

藥淳甚驚命北南面大臣議而李處溫蕭幹等有迎秦王拒湘陰王之說惟南面行營都部署耶律寧曰天祚果能以諸蕃兵大舉奪燕則是天數未盡豈能拒之否則秦湘父子也安有迎子而拒其父者處溫等以寧扇亂軍心欲殺之淳曰彼忠臣也焉可殺天祚果來吾有死爾復何面目相見耶已而淳疾自知不起密授處溫蕃漢馬步軍都元帥意將屬以後事及蕭幹等召宰執入議處溫稱疾不至陰聚勇士為備給云奉密旨防他變淳死蕭幹等乃立淳妻蕭氏為皇太后主軍國事奉遺命遙立秦王定為帝蕭后遂稱制改元德興諡淳為孝章皇帝廟號宣宗葬于燕西之香山蕭后聽政幹以后命召處溫至以時方多難未即加誅但追毀元帥劄子處溫父子懼禍南通重貫欲挾蕭后納土北通于金欲為內應事覺后執處溫問之處溫自陳有定策功后曰誤秦晉國王者皆汝父子何功之有并數其前罪惡數十處溫無

以對乃賜死，其子與而磔之，籍其家得錢七萬緡，金玉寶器稱是皆為宰相數月間所取也。

發明

死者貶而絕之，之辭淳前既已稱帝，至是卒而斥名書死者，不予淳之僭稱也。下書其妻

蕭氏稱太后以見不宜稱也。處溫助淳悖逆，誤國殄民，乃亂臣賊子之魁，祭耳分註以賜死，為文綱目變文特書伏誅，非所以予蕭氏之能討有罪也。為天下之討有罪也，其所以扶三綱立人極而教詔後世也。嚴矣。

廣義

嗚呼淳不能迎主歸國而反乘時射利，是穿窬之不若也。今而得戴其元以歸地下，幸矣。

及乎李處溫以禽獸之行遙立其君之子為帝，厥罪何可勝誅，惟耶律寧不忍乎此，故曰自古安有迎子而拒父者，豈非造次顛沛而能禮義自守者哉。此寧之所以異於國人也。多矣，然則分註載李

處溫不過曰賜死而其綱則大書曰伏誅何邪正名定罪也

夏人救遼金襲敗之于宜水

夏主使李良輔將兵三萬救遼金將幹魯羅索敗之于宜水追至野谷澗水暴至夏人漂沒者不可勝計

發明 閔元年齊人救邢春秋義之凡書救者未有不善之也救在京師則罪列國宋救李壇之圍是也救在敵人則罪中國契丹救北漢夏救遼是也救在遠國則罪四鄰吐蕃嘉勒斯賚敗趙兀是于河湟是也救而不速救者則書所次以罪其慢康王入衛次于東平是也救而不敢救者則書所至以罪其怯曲端次于襄樂不進是也兵者綱目所甚重衛靈公問陳孔子對曰軍旅之事未之學也獨至於救兵而書法若此君子之情見矣其稱人進之也輕行而掩之曰襲詭道而勝之曰敗

皆所以貶金
而予夏耳

廣義

當是時也遼金之不敵也審兵夏人何以救
為哉曰彼但知救災卹鄰之義其間強弱非

所論也嗚呼觀夫夏人此舉則知其正大光明非
若宋之助叛以伐無罪之國也孔子曰夷狄之有
君不如諸夏
之亡也信哉

秋七月詔童貫蔡攸再舉伐遼以劉延慶為都統制

王黼聞耶律淳死復命童貫蔡攸治兵
以河陽三城節度使劉延慶為都統制

初收經制錢

先是命陳遘經制江淮七路治于杭州以供餽餉遘
以財用不給創議比較酒務及度公家出納錢糧量

取其贏號經制錢遂為東南七路之害

癸明

嗚呼宋之虐民益甚矣東南為應奉花石之擾民不聊生今而又收經制則是民間之利

悉歸於上如水益深如火益熱而大為東南七路之害矣特書曰初蓋譏之也

八月金阿古達襲遼延禧于石輦鐸延禧敗走

遼主既失西京及沙漠以南遂奔于額蘇倫金舍音使幹里雅布告金主曰今雲中新定諸路遼兵尚數萬新降之民其心未固諸將望幸軍中金主從之既而聞遼主在大漁濼乃將精兵萬人襲之晉嘉努幹里雅布率兵四千為前鋒晝夜兼行追及遼主于石輦鐸軍士至者才千人遼兵二萬五千方治營壘晉嘉努與諸將議耶律伊都曰我軍未集人馬疲劇未可戰也幹里雅布曰追及遼主而不亟戰日入而遁

則無及矣遂戰短兵接遼兵圍之數重副統軍蕭特烈諭軍士以君臣之義士皆殊死戰遼主謂幹里雅布兵少必敗與妃嬪登高阜觀戰伊都指遼主麾蓋以示諸將幹里雅布遂以騎兵馳赴之遼主望之大驚即遁去遼兵遂潰幹里雅布還金主曰遼主去不遠盍亟追之幹里雅布追至鄂勒哲圖遼主棄輜重而遁蕭特烈被執

九月除朝散郎宋昭名

昭上書極言遼不可攻金不可鄰異時金必敗盟為中國患乞誅王黼童貫趙良嗣等且曰兩國之誓敗盟者禍及九族陛下以孝理天下其忍置河北之民於塗炭之中乎陛下以仁覆天下其忍置河北之民於塗炭之中而使肝腦塗地乎王黼大惡之除昭名編管海州

發明

家語曰人臣而忠其君者爵祿不足以賞也

取容以饗富貴而國家利害罔肯究心宋昭官非
臺諫職非言責不忍素餐之耻力陳經國之圖見
忤奸黨即除其名果何說哉其後金人敗盟一如
昭料若合符節然則君子之先見出於尋常萬萬
矣故書除宋昭名
所以著其無罪也

廣義

觀夫宋昭上書之言不惟中心激烈而且有
先見之明此即柳渾之料吐蕃也何其驗哉

綱目大書其官
者予之之深也

金遣使來命趙良嗣報之

金人間童貫舉兵恐朝廷徑取燕而歲幣不可得乃
遣使來議師期帝遣趙良嗣報之且言不負初約

遼將郭藥師以涿易二州來降

遼常勝軍帥郭藥師為涿州留守以蕭后立蕭幹專政國人多貳謂所部曰天祚失國女政不綱宋天子重兵壓境此男兒取金印時也遂擁所部八千人奉二州來降童貫受之以聞詔授恩州觀察使以兵隸慶劉延

發明

敵國之臣名姓不登於史冊微也藥師遼將曷為以姓氏通重地也以地叛雖賤必書地

以名其人終為不義弗可滅矣其書來降是接我以利而我入其利兩譏之也胡氏曰為國以義不以利如以利則上下交征而國必危矣為己以義不以利如以利則患得患失亦無所不至矣綱目於叛人雖賤特書其名以懲不義懼淫人為後戒也州而言以者言所歸之易也如春秋書莒牟婁

來奔
同意

冬十月劉延慶及郭藥師進兵攻遼藥師襲燕敗績延

慶兵潰

童貫遣劉延慶郭藥師將兵十萬出雄州以郭藥師為鄉導渡白溝延慶軍無紀律藥師諫曰今大軍跋隊行而不設備若敵人置伏邀擊首尾不相應則望塵決潰矣不聽至良鄉遼蕭幹率衆來拒延慶與戰而敗遂閉壘不出藥師曰幹兵不過萬人今悉力拒我燕山必虛願得奇兵五千倍道襲之城可得也因請延慶子光世簡師帥兵五千夜半渡盧溝倍道而進宣揚可世與藥師帥兵五千夜半渡盧溝倍道而進質明常勝軍帥甄五臣領五千騎奪迎春門以入藥師等繼至遣人諭蕭后使趣降蕭后密報蕭幹幹舉

精甲三千還燕卷戰光世渝約不至藥師失援而敗
與可世棄馬絕城而出死傷過半世宣死焉延慶營
于盧溝南幹分兵斷餉道擒龔糧將王淵得漢軍二
人蔽其目留帳中夜半偽相語曰吾師三倍漢軍敵
之有餘當分左右翼以精兵衝其中左右翼為應舉
火為期殲之無遺既言乃陰逸一人歸報延慶聞而
信之明旦見火起以為敵至即燒營遁士卒蹂踐死
者百餘里幹因縱兵追至涿水而去自熙豐以來所
儲軍實殆盡退保雄州燕人知宋之無能為作
賦及歌詩以誚之藥師還猶進安遠軍承宣使

廣義

是役也重貫以奸貪閭豎藥師以叛君降敵
而延慶又非智勇之將正孟子所謂以若所

為求若所欲盡心力而為之後必有災是也惟是
之故故蕭幹帳中之謀一出宋師遽爾狼狽積年
所蓄軍實一旦盡為金有宜有以來燕人之誚也
由是觀之則知君能知人然後可以擇將將得其

欽定四庫全書

御批通鑑輯覽
卷十

人然後可以克敵
徽宗何足以知之

以蔡攸為少傅判燕山府○十一月金人來議燕地十
二月遣趙良嗣復如金求營平灤三州

初朝廷與金約但求石晉賂契丹故地而不思平營
灤三州乃劉仁恭獻契丹以求援者既而王黼悔欲
併得之金主不肯及趙良嗣往金主使普嘉努趙
嗣以出兵失期且云今更不論元約特與燕京薊景
檀順涿易六州良嗣言元約山前山後十七州今乃
如此信義安在抗辨數四金人不從良嗣乃與其吏
李靖偕來止許山前六州帝復
遣良嗣送之且求營平灤三州

癸明遣使須索之謂求昔者周天王求賻求金求
車春秋譏之况求地於敵人乎綱目於求營

平濠三州特書曰求垂後戒也王者有求下觀而
化孟子曰王曰何以利吾國大夫曰何以利吾家
士庶人曰何以利吾身上下交征利而國危矣苟
為後義而先利不奪不饜胡氏曰古之人君必內
脩厥德辨上下定民志節以制度不傷財不害民
故府庫充實倉廩盈餘四方觀德萬國來王而天
下治矣及侈心一動浸不可遏必至於三綱淪沒
五典弛隳迨其亡國滅身而後止也觀綱目所書
則見宋室喪亂之由而知興衰撥亂之說矣

廣義

抑觀燕乃石晉故地賂契丹者與夫營平濠
三州皆非宋祖宗立國之初所得之地也徽

宗何不自揣而屑屑請求于金邪然謂之求則必
屈已下人而俛首聽其依撥耳孰謂剛明之君有
是我曾子曰吾聞與人者常驕人受人者常畏人
蓋以此耳書稱成湯由七十里而至于有萬邦其

所有之萬邦未聞其有一之請求于人也惟知當時室家相慶而已稱文王曰惟我有周誕受多方其所有之多方亦未聞其有一之請求于人也惟知當時西土怙冒而已故成湯自諧侯而陞為天子文王由西伯而道行中國若火之始然而自有不可遏者矣後世不量力而度德動輒請地求地於人其最甚者惟智伯耳智伯之下又有徽宗馬使智伯脩德自強而無狼臯之貪求則豈特頭漆于襄子而襄子且將見役矣今徽宗脩德自強而無燕雲之固請亦豈直身沒于金人而金人必將受命矣昔唐太宗所謂剖腹藏珠柝子厚所謂負版者智伯徽宗似焉

加郭藥師武泰節度使○金克遼燕京耶律淳妻蕭氏
奔天德

童貫再舉伐燕不克成功懼得罪乃密遣王環如金以求如約夾攻金主遂分三道進兵遼德妃蕭氏五上表于金求立秦王定金主不許遼人遂以勁兵守居庸關金兵至關厓石自崩戍卒多壓死遼人不戰而潰金兵度關而南遼統軍都監高六等送款于金金主至燕京遂自南門入使尼楚赫羅索陳于城上金主次于城南遼宰相左企弓參政虞仲文康公弼樞密使曹義勇張彥忠劉彥宗等奉表降詣金營請罪金主並釋之命守舊職而遣左企弓等撫定燕京諸州縣蕭德妃與蕭幹自古北口趨天德於是遼五京皆為金有金主遣騎兵送趙良嗣還且獻遼俘

廣義

嗚呼貪功利者莫如童貫而無能為者亦莫如童貫分注云童貫再舉伐遼不克成功懼

得罪乃密遣王環如金以求如約夾攻及至克遼未聞其有分毫之力况乎金師至遼如入無人之

境其陷燕京也若探物于嬰兒之握何其易哉此所以來輕宋之心而垂涎于汴鼎也曰遼主何以書名而於其后何以書妻因其事而貶之也故主猶存所以斥其名而妻其后也故曰春秋成而亂臣賊子懼臣賊子懼臣亦曰綱目脩而亂臣賊子懼

萬歲山成更名曰良嶽

山周十餘里其最高一峯九十步上有亭曰介分東南二嶺直接南山山之東有萼綠華堂書館八仙館紫石巖棲真嶺覽秀軒龍吟堂山之南則壽山兩峯並峙有鴈池唯唯亭山之西有藥寮西莊巢雲亭白龍汧濯龍峽蟠秀練光跨雲亭羅漢巖又西有萬松嶺半嶺有樓曰倚翠上下設兩關關下有平地鑿大治治中有兩洲東為蘆渚浮陽亭西為梅渚雪浪亭西流為鴈池東出為鴈池中分二館東曰流碧西曰

環山有巢鳳閣三秀堂東池後有揮雪廳復由磴道上至介亭亭左復有極目亭蕭森亭右復有麗雲亭半山北俯景龍江引江之上流注山間西行為漱瓊軒又行石間為煉丹凝觀園山亭下視江際見高陽酒肆及清澗閣北岸有勝筠庵躡雲臺蕭閑館飛岑亭支流別為山莊為回溪又於南山之外為小山橫亘二里曰芙蓉城窮極巧妙而景龍江外則諸館舍尤精其北又因瑤華宮火取其地作大池名曰曲江池中有一堂曰蓬壺東盡封邱門而止其西則自天波門橋引水直西殆半里江乃折南又折北折南者過間閣門為複道通茂德帝姬宅折北者四五里屬之龍德宮既成帝自為良嶽記以為山在國之良位故也初朱勔於太湖取石高廣數丈載以大舟挽以千夫鑿城斷橋毀堰拆牖數月乃至會得燕地因號昭功敷慶神運石立于萬歲山又作絳霄樓勢極高峻盡工藝之巧其後羣閣興築不已於是山林巖壑日

益高深亭臺樓觀不可稱紀又以
金芝產于萬壽峰更名壽嶽云

癸明

特書曰成讖久費也政和七年冬書作萬歲
山至是年冬而始峻事則跨歷六年極土木

之盛殫億萬之財天怒於上而不悟民怨於下而
不知欲蓋彌張泰然自侈是時強敵在外漸為國
患宋之君臣曾未見其思患預防之心而徒今日
斂民貲明日勞民力自古荒淫之君愚之甚者未
有如徽宗之甚者也噫民心既離天命亦叛雖有
臺池鳥獸豈能獨樂哉綱目書此文無貶詞乃所
以深貶之也其垂
世立法之意嚴矣

廣義

前輩嘗謂秦皇以奢侈暴斂而亡漢武奢侈
暴斂不異於秦而其國不亡者用人納諫悔

過等事之善與夫後人不失其道而無子嬰之愚
故也又况盜賊滿山終無豪傑下至叔寶楊廣無

足為道今也徽宗艮嶽之奢溢于阿房之侈花石之擾浮于頭會其歛籍元祐黨人毀蘇黃文集甚於焚書坑儒凡百所為甲於秦皇而其胸襟齷齪又非秦皇比也其視漢武不啻天冠地履何敢望焉況乎金人一豪莫之與競實非漢武時盜賊而徽宗用兵行師乃付之昏愚閭寺之貫譬則久病尪羸之人而加以酒色並行雖俞扁烏能起哉其可悲也已

戶部獻今年民數

時天下分為二十六路京府四府三十州二百五十四監六十三縣一千二百三十四戶二十八萬八千二百五十八口視西漢盛時蓋有加焉隋唐疆里雖廣而戶口皆不及

癸明

元豐六年戶部奏戶一千七百二十一萬一千七百一十三至是所奏之數戶二千八十

八萬二千二百五十八口四千六百七十三萬四千七百八十四較之元豐實多三分之一夫有盛必有衰固天地盈虛之數徽宗恃其戶口之富窮奢極欲自謂長享太平不料禍出目前生民塗炭才四年間其天下大亂向來富庶之盛果何恃乎方其溺愛之時特一蔡京童貫所信僅若毫芒然而驕奢淫佚之事皆由之而出其極遂致喪壞生靈若是其衆可謂其源甚微其流甚廣者矣人主觀此要當兢畏持守毋使乍盛而忽衰暫安而遽危則亦庶乎其可也於戲保治之難如此可不畏戒諸

廣義

分注云戶口視西漢盛時蓋有加焉隋唐疆理雖廣而戶口皆不及可謂盛矣嗚呼盈成

之運雖賢明之君尚或難於撫馭況中才與庸闇者乎昔唐太宗與羣臣論創業守成乃曰創業固難守成亦不易蓋以知夫君心之侈不生于天下多事之日每生於天下富豐之時逸樂者危亡之本憂患者治平之基徽宗當天下之富豐則當兢業自持常恐仰馬愧于天俯馬忤于人而吾宗社之重何以堪之厥位之尊何以保之四夷來王何以來之金人桀黠何以待之若游大川懼弗克濟親君子遠小人旁求俊彥以釐天事若然則仰不愧天俯不忤人宗社不足堪厥位不足保四夷來王而金人聽命也必矣大易蒙之六五曰童蒙吉是也惟其不然故不至於危亡不止也大書戶部獻今年民數則知徽宗之志益驕矣

癸丑五年

金太宗完顏烏奇邁天會元年

春正月遼知北院樞密事奚和

勒博自稱奚帝

金兵入燕奚和勒博即箭筈山自立為奚國皇帝改元天復設奚漢渤海三樞密院改東西節度使為二王分司遼主命都統耶律瑪格討之

發明

自稱者不宜稱也人臣當國步艱難之時不能匪躬濟蹇而乃據地稱尊皆綱目之所惡也故夫書遼知北院樞密事奚和勒博所以正君臣之分也書自稱奚帝所以嚴上下之防也

金遣使來趙良嗣復如金

良嗣至燕與金主議燕京西京之地金主曰若宋必欲平灤等州則并燕京不與因以荅書先示良嗣良嗣讀至燕京用本朝兵力攻下其租稅當輸本朝良嗣因曰租稅隨地宜有與其地而不與其租稅者尼

瑪哈曰燕京自我得之則當歸我大國熟計若不早見與請速追涿易之師無留我疆於是遣李靖等與良嗣偕來靖既入對遂見王黼黼謂靖曰租稅非約也上意以交好之故欲以銀絹充之靖復請去年歲幣帝亦特許之仍命良嗣與靖偕使

以王安中知燕山府郭藥師同知府事

朝廷以金人將歸燕謀帥臣守之左丞王安中請行王黼贊於帝遂授安中慶遠軍節度使河北河東燕山府路宣撫使知燕山府郭藥師為檢校少保同知府事詔藥師入朝禮遇甚厚賜以甲第姬妾命貴戚大臣更互設宴又召對於後苑延春殿藥師拜廷下泣言臣在敵中聞趙皇如在天上不謂今日得望龍顏帝深褒稱之委以守燕對曰願効死又令取天祚以絕燕人之望藥師變色言曰天祚故主也國破出

走臣是以降陛下使臣畢命他所不敢辭若使反故主非所以事陛下願以付他人因涕泣如雨帝以為忠解所御珠袍及二金盆以賜藥師出諭其下曰此非吾功汝輩力也即剪盆分給之加檢校少傅歸鎮燕山府路轉運使呂頤浩言開邊極遠其勢難守雖窮力竭財無以善後又奏燕山河北危急五事帝怒命貶官而職任如故

金以遼平州為南京命張穀留守

遼平州人張穀為遼興軍節度副使遼主之走山西也平州軍亂殺其節度使蕭迪里穀撫安亂者州民推穀領州事耶律淳死穀知遼必亡乃藉壯丁五萬人馬千匹練兵為備蕭德妃遣時立愛知平州穀拒弗納金人入燕京訪穀情狀于康公弼公弼曰穀狂妄寡謀彼何能為當示以不疑金人招時立愛赴軍

前加穀臨海軍節度仍知平州既而尼瑪哈又欲先
下平州擒張穀公弼曰若加兵是趣之叛也公弼請
自往覘之遂見穀穀曰契丹八路七路已降今獨平
州存敢有異志所以未解甲者防蕭幹耳厚賂公弼
使還公弼還言于尼瑪哈曰彼無足慮也乃升平
州為南京加穀試中書門下平章事判留守事

廣義

嗚呼遼之亡也若土崩瓦解並無一人忠義
相與維持固守可哀也已當是時也七路已
降獨平州一路未降為張穀者尚可傳檄四方招
集勤王若顛木之有藥可也今乃反曰所以未
解甲者防蕭幹耳觀此一言則知遼之諸臣共以
遼國持贈金人也厥罪可勝誅耶故綱目大書曰
金以遼平州為南京命張穀留守以見張穀者遼
之守臣也金人不廢一鏃不遺一矢命遼守臣守
遼之土而已噫非金之滅遼遼乃
自滅之耳學者味之其義見矣

二月以李邦彥趙野為尚書左右丞○遼延禧追廢淳為庶人殺淳妻蕭氏

遼主聞南京破出奔四部族蕭德妃來見遼主怒殺之追降淳為庶人降其屬籍而赦其黨蕭幹奔奚

廣義

或曰秦晉國王淳遼主之叔也蓋嘗稱帝而後廼其妻矣綱目何以不帝不后而名之氏

之邪曰不然周公之與成王以親言則周公叔父也成王猶子也以分言則自有君臣尊卑之禮哉然而不可紊者也故書稱周公作誥而傳之者則曰周公傳王命以告多士所謂天無二日民無二王是也烏有一君在而自立為君者哉其篡逆之惡莫過於此綱目嚴毅剛正而直書于冊者誅首惡之法律也可畏哉

三月遣使如金

趙良嗣至燕謂金主曰本朝狗大國多矣豈平灤一事不能相從邪金主曰平灤欲作邊鎮不可得也遂議租稅金主曰燕租六百萬止取一百萬不然還我涿易舊疆及常勝軍我且提兵按邊良嗣曰本朝自以兵下涿易今乃云爾豈無曲直邪且言御筆許十萬至二十萬不敢擅增乃令良嗣歸報金主謂之曰過半月不至吾提兵往矣時左企弓嘗以詩獻金主曰君王莫聽捐燕議一寸山河一寸金故金人欲背初約要求不已良嗣既還金聞遼主謀復故地乃悉斷盧溝北橋梁焚次舍以防之良嗣行至雄州以金書遞奏其畧言貴朝兵不克夾攻特因已力下燕所以拘稅今據燕管內每年租六百萬貫良嗣等稱御筆許二十萬以上不敢自專其平灤等州不在許限儻務侵求難終信義仍速追過界之兵王黼欲功之

速成乃請復遣良嗣自雄州再往使許遼人舊歲幣四十萬之外每歲更加燕京代稅錢一百萬緡及議畫疆與遣使賀正旦生辰置榷場交易金主大喜遂使尼楚赫等持誓書草來許以燕京及六州來歸而山後諸州及西北一帶接連山川不在許與之限意曲意從之遣盧益趙良嗣等持誓書往至涿州金古紳等先索書觀之言其字畫不謹令易之益言帝親書所以示尊榮於大國也金人不聽凡至汴京更易者數四金人又言近有燕人趙溫訊等逃出南朝須先還方可議交燕地良嗣諭宣撫司縛送溫訊於金既至尼瑪哈釋其縛而用之金人又求糧良嗣許以二十萬石

廣義

抑考童貫再舉伐燕不克成功懼得罪故遣使如金求夾攻燕至於克燕乃獨金人之力

貫無分毫之功今馬屑屑請求燕地金人曷得不索燕租而遽爾與之邪且爭地以戰本為租稅以

充國用既以租稅與人其地將焉用之況租稅既以與彼則彼為主我為客矣夫所賴乎主中國者以我為主而四方俱受制也今反以租稅與人而已徒取其地不免俯首乞憐何其惑歟是則索燕租者金之上策與燕租者宋之下策耳何也蓋敵情貪狡稍不如意則必敗盟所以他日致其興兵之辭者其原蓋出于此

夏四月金人來歸燕及涿易檀順景薊之地詔童貫蔡攸班師

金人既遂所欲乃使楊璞以誓書及燕京六州來歸而營平灤三州終以非石晉所賂契丹之地不預焉詔童貫蔡攸入燕交割時燕之職官富民金帛子女皆為金人所掠而東惟存空城而已尼瑪哈猶欲止

割涿易金主曰海上之盟不可忘也我死汝則為之貫等奏燕城老幼迎謁焚香稱壽帝為之曲赦兩河

燕雲命即

日班師

發明

來歸者金人心服而歸之也然曷為心服而歸之宋求地於金惟遂欲速之心不顧禮之

可否所欲必得無請不從增歲幣納租稅而燕之子女玉帛皆為金人所取所得者不過空城而已以有用之財易無用之地竊謂徽宗不取也春秋書齊人來歸鄆謹龜陰田君子美之定公齊侯會于夾谷孔子攝行相事以禮相見却裔俘拒兵車之命而罷宴享之設由是齊侯歸三邑以謝過此所謂心服而歸之也徽宗屈已徇金僅得燕地夫豈心服而歸之乎然宋既求於金而金樂然與宋是亦心服者故其書法如此美惡不嫌同辭其義自見

廣義

觀綱目所書則知金人所得者實効也宋人所得者虛名也實効與虛名其所得者奚翅

什百千萬哉宋之君臣謀國如此其左尚何以勝人為望邪噫已不可欺也徽宗此舉是欺已也既欺乎已而欲人之不己欺者難矣

金襲遼延禧于青塚獲其子女族屬從臣以歸延禧邀

戰敗績走雲內

金以幹魯為都統幹里雅布副之使襲遼主于陰山至居庸獲林牙耶律達實幹魯使幹里雅布尼楚赫羅索以兵三千分道襲遼主將至青塚遇泥濘不能進幹里雅布以繩繫達實使為鄉導趨遼主營幹魯等大軍繼至時遼主往應州其子秦王定許王寧及諸妃女并從臣皆被執盡失輜重萬餘乘惟太保特

默格竊遼主次子梁王雅里及長女特哩乘軍亂出
赴遼主軍得免幹魯兵至索勒敏為書招遼主遼主
自金城來聞金人以所獲東去率兵五十餘邀戰于
白水漂幹里雅布以兵千餘敗之遼主遁去金人獲
遼主長子趙王實訥將追奔二十餘里盡得其從馬
別獲遼牧馬萬四千匹車八千乘遼主使人持兔紐
金印偽請降于金而西走雲內幹里雅布復以書招
遼主諭以石晉北遷事遼主答書乞為弟若子量賜
土地幹里雅布不許

發明

輕行而掩之曰襲獲者賤之之辭書獲其子
女族屬從臣以歸惡其不能死難賤而絕之

也不曰敗而曰敗績謂與備戰雖敗亦榮也延禧
雖值喪亂而不忘讐敵此所以嘉其志而不絕焉
耳較諸偷生迎降服為臣
僕者豈不大相懸絕哉

五月以楊時為邇英殿說書

時入對言于帝曰熙寧之初大臣文六藝之言以行其私祖宗之法紛更殆盡元祐繼之盡復祖宗之舊熙寧之法一切廢革至紹聖崇寧抑又甚焉凡元祐之政事著在令甲皆焚之以滅其迹自是分為二黨縉紳之禍至今未殄臣願明詔有司條具祖宗之法著為綱目有宜于今者舉而行之當損益者損益之元祐熙豐姑置勿問一趨於中而已又言燕雲之師宜退守內地以省轉輸之勞募邊民為弓弩手以殺常勝軍之勢又言都城無高山巨浸以為阻衛士人各異心緩急不可倚仗君臣警戒正在無虞之時帝首肯之除邇英說書

廣義

觀夫龜山入對之言其救時之策莫良於此夫何徽宗但首肯之未聞其舉而行之也孔

子曰說而不繹從而
不改其徽宗之謂歟

以王黼為太傅總治三省事鄭居中為太保蔡攸為少
師進封童貫為徐豫國公居中辭不拜

王黼竭天下之財以北征僅得七空城至是率百官
表賀詔以收復燕雲宰執皆進位而命王黼總治三
省事賜玉帶以趙良嗣為延康
殿學士居中自陳無功不拜

發明徽宗竭天下之財力得七郡之空城論功行
賞不亦謬哉惟居中自陳無功不受封爵庶

幾彼善於此者矣據
事直書美惡自見

廣義燕地之租不入于金則燕雲之地決不可得
也故王黼羣奸欲速邊功之成所以許歲幣

許稅錢不惜國體然後得復此燕雲空虛之地夫何徽宗不此之察反加王黼等爵位之尊而不知國實被其潛賣也惜哉曰居中何以辭而不拜乎曰羞惡之心人皆有之賢者能弗喪耳居中有焉

遼延禧奔夏都統蕭特烈等以梁王雅里稱帝

夏主李乾順遣使請遼主臨其國遼主從之中軍都統蕭特烈等切諫不聽遂渡河次于金肅軍北遣使冊乾順為夏國皇帝人情惶懼不知所為特烈陰謂耶律元直曰事勢如此億兆離心正我輩効節之秋不早為計柰社稷何乃共劫遼主第二子梁王雅里走西北部三日遂立為帝改元神厯以特烈為樞密使特默格副之雅里性寬大惡誅殺獲亡者苦之而已自歸者即官之

發明

奔者急詞也以稱帝何不宜稱者也然雅里延禧之子延禧奔夏人情惶懼况喪亂之時

立子以安人心乃權而得中者曷為以僭稱書蓋肅宗亦明皇之子明皇奔蜀肅宗即位于靈武君子尚以篡位為嫌是時延禧未聞有傳位之事肅特烈等矚禧奔夏即立梁王是蓋與篡國之臣特一聞耳其與蒯軫拒父之意何殊哉據事直書不再貶而其義自見矣

廣義

自古國君之所以得常勝夫敵國者以其勢在我也遼主奔夏則是依夏為主而其勢在于夏焉今而反冊夏主何其不知量哉易曰利用為依遷國遼人何足以知此其不至于魏武之於宇文泰者幾希矣

奚和勒博為其下所殺

和勒博為郭藥師所敗一軍離心其黨耶律阿古齊等遂殺之

發明

昔者安史反逆皆死於其子天理固為甚明和勒博乘亂僭竊尤而效之故為其下所殺

綱目書之為斯世戒亂臣賊子尤欲稱亂不已乎

金遣使如夏

幹里雅布趨天德聞夏迎護遼主遼主渡河乃遺書于夏使執送遼主且許割地

六月命張穀以平州來歸

金驅遼宰相左企弓虞仲文曹義勇康公弼同燕京大家富民俱東徙燕民流離道路不勝其苦過平州遂入城言于張穀曰左企弓不能守燕致吾民如是公今臨巨鎮握強兵盡忠於遼使我復歸鄉土人心亦惟公是望穀遂召諸將領議皆曰聞天祚兵勢復振出沒漠南公若仗義勤王奉迎天祚以圖興復先

責左企弓等叛降之罪而誅之盡歸燕民使復其業而以平州歸宋則宋無不接納平州遂為藩鎮矣即後日金人加兵內用營平之軍外藉宋人之援又何懼焉穀又訪於翰林學士李石亦以為然穀乃遣張謙帥五百餘騎傳留守令召左企弓虞仲文曹義勇康公弼至灤河西岸數企弓等十罪皆縊殺之穀乃稱保大三年畫天祚像朝夕謁事必告而後行稱遼官秩榜諭燕人復業恒產為常勝軍所占者悉還之燕民既得歸大悅李石更名安弼偕故三司使高黨至燕京說王安中曰平州形勢之地張穀總練之才足以禦金人安燕境幸招致之毋令西迎天祚北合蕭幹也安中深納之令安弼黨與至汴以聞帝以手札付同知燕山府事詹度第令羈縻之而度促穀內附穀乃遣張鈞張敦固持書來請降王黼勸帝納之趙良嗣諫曰國家新與金盟如此必失其懽後不可悔不聽良嗣坐削五階而詔安中及詹度厚加安撫

與免三年常賦穀
聞之自謂得計

發明

張穀何以不書叛背敵內附理之正也况張

者欲倚之以復遼讐耳是蓋心服而歸之者也雖然招亡納叛清朝不取宋納張穀而遂為金人用兵之端豈非貪利忘害之大病乎迨至殺穀畀金不惟失國體抑且將士離心矣蓋察理不明而有此弊豈不深可惜哉

廣義

張穀既以平州降金復以之歸宋則其中無所主而聽命於人者也曾謂忠臣義士有是

哉若穀者其見利忘義之小人也

鄭居中卒以蔡攸領樞密院事○秋七月童貫致仕以

內侍譚稹為兩河燕山路宣撫使

貫與蔡攸歸自燕頗失上意王黼梁師成共薦稹代貫交雲中之地稹至太原招朔應蔚諸州降人為朔軍寧

發明

嗚呼觀徽宗無歲不以宦官為用迭興迭滅其禍相尋於無窮烏得而不亂哉是時童貫

甫令致仕而代者已踵其後故書以譚稹為兩河燕山路宣撫使則是童貫雖罷而實未嘗罷也天下何由而泰乎吁

廣義

仕者與君共天位食天祿者也非其德足以正君善俗其才足以脩政立事者不預焉豈

有刑餘奴隸之賤而可以致仕名之乎且又以譚稹代貫者于以見宋之邊事皆付之閹豎也雖欲

不亡
得手

禁元祐學術

中書言福建印造司馬光等文集詔令毀板凡舉人傳習元祐學術者以違制論尋又詔蘇軾黃庭堅等獲罪宗廟義不戴天片言隻語並令焚毀勿存違者以大不恭論

廣義

抑觀元祐學術通天地質鬼神闢奸邪扶正直為上為德為下為民萬世仰如山斗所謂

無間然者也諸賢何負於徽宗前既禁其學術矣又禁以元祐學術政事授業者今又再禁其學術嗚呼徽宗之世所謂通天地而閉塞焉者也一有正直之士衆必鋤治簸揚使其不能容足於朝非竄逐則安置朝進實封暮承貶詔其視學術之正如元祐者毒如讐家則是通國皆非元祐學術者

也故曰不有君子其
何能國宋其殆矣

八月朔日食○遼都統蕭幹自稱奚帝引兵破景薊州
遂攻燕與郭藥師戰敗走死詔加藥師太尉

金人既陷燕京幹就奚王府自立為神聖皇帝國號
大奚改元天嗣時奚人饑幹出盧龍嶺攻破景州又
敗常勝軍於石門鎮陷薊州寇掠燕城其鋒銳甚有
涉河犯京師之意人情洶洶頗有謀棄燕者已而藥
師大破其衆乘勝窮追過盧龍殺傷大半幹遁
去尋為其下所殺傳首京師詔加藥師太尉

金阿古達死弟烏奇邁立

金主去燕京六月有疾命尼瑪哈為都統普嘉努幹
魯副之駐兵雲中以備邊而還八月至部堵濶而卒

年五十六古倫貝勒舍音等請安班貝勒烏奇邁即位更名歲改元天會以舍音為安班貝勒幹布為古倫貝勒相與輔政幹布太祖庶長子也九月葬太祖于海古城西

發明

春秋吳楚之君書卒而不書葬避其號也阿古達世為遼臣率精銳之兵肆意侵伐其僭

號則曰稱帝其舉兵則曰金人其卒則直書之曰死皆所以仍其國俗之舊而不使其同于中國諸侯之列耳如知乎此始可與論綱目矣

廣義

阿古達國王也何以書死蓋謹之也

冬十月遼雅里死蕭特烈等復立耶律珠拉為帝

珠拉聖宗孫也

詔建平州為泰寧軍以張穀為節度使

金人聞穀叛遣棟摩將三千騎來討穀率兵拒之于營州棟摩以兵少不交鋒而退穀遂妄以大捷聞朝廷拜穀節度使犒賞銀絹數萬

十一月幸王薊第觀芝

帝由便門過梁師成家復來薊第因大醉不能語夜漏上五刻乃開龍德宮複道小門以還內侍十餘人執兵接擁是夜諸班禁從皆集教場備不虞幾至生變翌日猶不御殿殆半日人心始少安祖宗以來臨幸未之有也

癸明

凡觀譏之也幸王薊第觀芝甚譏之方是時金人强悍肆意侵陵既敗遼師勢益猖獗因

納張穀每欲加兵比乃敵國外患臨深履薄恐懼
脩省之時其君當倚於法家拂士以德脩國政其
臣當責難陳善以禮格君心內用賢才外弭強敵
保祖宗之業若弗暇也今乃施施然安於不競無
憤恥自強之志惟無益之物是觀是玩及金人入
寇上下離心顧欲徵兵拒敵不亦晚乎綱目之法
制治于未亂保邦于未危是以深惡徽宗之失德
明其義者然後知君子作綱目於一臺園之藥一
無益之觀必謹而書以重民力以譏廢
政其弭亂持危固結人心之慮遠矣

金人襲平州張穀奔燕山平州人殺金使以拒守

棟摩無功而退金主使幹里雅布督棟摩攻平州會
張穀聞朝廷犒賜將至喜而迎幹里雅布乘其無備
襲之與穀戰于城東穀敗宵奔燕山王安中納而匿
之平州都統張忠嗣及張敦固出降金金遣使與敦

固入諭城中城中人殺其使者立敦固為都統閉門固守

發明

金稱人浸強也政和五年擊遼兵于達嚕噶城大敗之固已強矣然獨舉其號者始見綱

目則本其僭竊之罪明其侵奪之非著王法也宣和元年來聘嘉其慕義乃以人書四年襲遼軍惡其叛主復以號舉至是伐張穀也亦書人者豈許其伐罪而人之乎據中原僭大號偁宋室擅威權其所由來者漸矣其與春秋書楚人伐鄭義同後皆倣此

詔殺張穀函首以畀金

金人以納叛來青朝廷初不欲發遣金人索之益急王安中取貌類穀者斬其首與之金曰非穀也遂欲以兵攻燕安中言必不發遣懼起兵端朝廷不得已令安中縊殺之函其首併穀二子送于金於是燕降

將及常勝軍士皆泣下郭藥師曰金人欲弔即與若
求藥師亦將與之乎安中懼因力求罷召為上清寶
籙宮使以蔡靖知燕山府事自是降
將卒皆解體而金人遂用此興師矣

發明

凡事順來者當以逆料逆來者當以順揆弔

熟思審處意以弔之背主歸來彼必見惡猶我叛
人之歸彼亦我之所惡也責人之心責已起已之
心恕人由是拒之而弗納則彼此相安而釁端絕
矣夫何既利其土地而納之復因其來索而弔之
噫何故相率來降以求殺耶嗣此燕之降將叛卒
怨憤泣下人無固志金亦藉此以為用兵之端豈
不深可惜哉國必自伐然後人伐之此之謂也
故直書詔弔張弔函首界金所以深罪之耳

廣義

嗚呼宋人可謂識見短而中情怯者也當張
弔以平州來歸之日君臣同心揆諸已曰張

鼓反覆小人也既叛于遼復叛于金前既以平州降金則平州乃金之所有者也今以之歸我則金必讐於我使或加兵而無禮於我我將何以禦之度其可禦受之可也也不可禦不受可也今韓里雅布遣人以納叛來責則直在金而曲在於宋也明矣由是一聞金欲加兵遂殺張鼓以塞其責此所以示弱於金而金人得以指為他日興兵之由也臣故曰宋人可謂識見短而中情怯者也

遼珠拉及蕭特烈為亂兵所殺○金人來歸武朔州

朝廷以山後諸州請于金金主新立將許之凡瑪哈自雲中至言于金主曰先帝初圖宋協力攻遼故許以燕地宋人既盟之後請加幣以求山西諸鎮先帝辭其幣而復與之盟曰無匿逋逃無擾邊民今宋數路招納叛亡累疏叛人姓名索之童貫不遣盟未期年今已如此萬世守約其可望乎且西鄙未寧割付

山西諸郡則諸軍失屯據之所將有經畧或難持久請勿與之金主遂遣使止以武朔二州來歸

廣義

大凡理勢在我則請求得遂理勢在彼如請求何觀尼瑪哈之言則理勢之在於金也什

其九矣使金不與武朔亦無如之何既與武朔宋其幸焉

甲辰六年春正月夏稱藩于金金以邊地畀之

夏得金書遣巴哩公亮奉誓表請以事遼之禮稱藩于金且受割賜之地尼瑪哈承制割下寨以北陰山以南伊賓伊喇部圖嚕漂西之地與之自是兩國信使不絕

三月金人來索糧不與

金遣使詣宣撫司索趙良嗣所許糧二十萬石譚稹曰二十萬石豈易致邪良嗣口許豈足憑也遂不與

金人由
是大怒

發明

敵人之情貪婪無厭是以宜疎而不宜親宜遠而不宜近也宋以欲速之心共議攻遼之

策既許燕租復吝不與則是中國失信於敵人而曲在中國矣昔石敬瑭借兵契丹事之甚謹其後子孫少逆社稷為墟宋殷鑑不遠何以復循故轍乎此蓋小人謀國不臧以貽大患釁端既啟誰復救哉愚以為清斯濯纓濁斯濯足自取之也吁

廣義

書曰朕聖讒說殄行詩曰取彼譖人孔子之遠佞人孟子之惡利口無非慮其為國之害

故耳彼趙良嗣者本燕人無行之馬植也前既以圖燕之下策妄進于朝今又以糧餉之重事輕許于金是則議圖燕者良嗣也許糧餉者亦良嗣也嗟乎宋與金終不能解讐釋怨而貽禍之烈者由

乎徽宗輕信讒人也傳曰
辟則為天下僂矣信哉

閏月京師河東陝西地震

宮殿門皆搖動有聲河東陝西尤甚蘭州地及諸山
草木悉沒入而山下麥苗皆在山上詔右司郎中黃
潛善按視潛善不以實聞上
意乃安遷潛善為戶部侍郎

夏四月起復李邦彥為尚書左丞

時邦彥居父
喪纔兩月

發明

書起復者譏詞也非有金革之事奪人之喪
自奪其喪皆非也邦彥姦邪未聞黜逐今乃

仍起之為尚書左丞此何義也是時徽宗惑於邦
彥之欺蔽所為若此悖禮甚矣比事觀之其失自

見

六月金人陷平州

張敦固出兵與金人戰大敗州民猶不肯降金主召幹里雅布還下詔招撫棟摩竟克平州執敦固殺之

科免夫錢

自得燕地悉出河北河東山東之力以往饋官軍率十數石致一石纔一年三路皆困王黼乃請召京西淮南兩浙江南福建荆湖廣南措置調夫各數十萬並納免夫錢每夫三十貫委漕臣限督之又詔宗室戚里宰執之家及官觀寺院一例均敷於是徧率天下所得纔二十萬緡而結怨四海矣

秋七月置璣衡所

王黼言項得方士璣衡之書足以察七政
詔置璣衡所以黼及內侍梁師成領之

發明

是時天下惶懼四海離心宋之君臣正宜更
相戒飭一新政令而迂績天命焉顧乃溺於

宴安耽於逸樂惟知自奉而不知瘠民科免夫錢
而結怨四海矣置璣衡所而朝政愈煩矣故曰禹
湯文武以仁得之桀紂幽厲以不仁失之徽宗寵
信姦回變更法制日積月累漸迫危亡既無禹湯
文武之仁而有桀紂幽厲之暴天下之亂不占可
知也君子豈不深為徽宗惜哉備書于冊其義見
矣

遼延禧復東勝諸州至武州與金人戰敗走山陰

遼主復渡河居于圖魯卜部耶律達實自金來歸遼
主責之曰我在汝如何敢立淳達實對曰陛下以全

國之勢不能一拒敵棄國遠遁使黎民塗炭即立十
淳皆太祖子孫豈不勝乞命于他人邪遼主無以答
賜酒食而赦之金襲遼主營遼主北走瑪克實迎遼
主至其部事之謹遼主遂得至烏爾古德呼勒部遼
主得耶律達實及瑪克實之兵自謂有天助再謀出
兵收復燕雲達實諫曰向以全師不謀戰備使舉國
皆為金有國勢至此而方求戰非計也當養
兵待時而動不可輕舉遼主不從遂及於敗

發明

凡與讐戰皆春秋之所予故變文書復所以
嘉其志而樂予之者也夫金遼世讐不共戴

天延禧不競遂失全國今能大振委靡恢復諸州
則其中心亦非甘於自棄者蓋復讐之義無時焉
而少忘也功雖不就其志可尚戰而敗走庸何傷
乎較諸輿櫬面縛服為臣僕豈可同日而語哉此
綱目所以特書
而亟予之耳

八月譚稹罷復以童貫領樞密院事兩河燕山路宣撫使

初金人以拓跋故地雲中二千里遺夏止以武朔二州來歸至是夏人舉兵侵武朔地界譚稹遣兵禦之兵數交夏人未即退聽又金人以朝廷納張穀不給糧遂攻應蔚遂守臣朝廷罪稹措置乖方詔致仕以貫代之時遼主延禧在夾山帝欲誘致之始遣一番僧齋御筆絹書通意及延禧許歸遂易書為詔許侍以皇弟之禮位燕越二王上築第十間女樂三百人延禧大喜貫之是行名為代稹交割山後土地其實已約延禧來降自往迎之也

發明

前知童貫之非才罷之而用譚稹比惡譚稹之無畧罷之而用童貫何謬妄之若是耶夫

赦

天下禍亂近在目前皆童貫等陰賊於外誠王法之所不原者徽宗溺愛不明以爲貫優才幹復舉用之以之領事樞密以之宣撫遠方而謀臣戰將一切擯棄殊不知用貫一日而天下壞亂一日也蓋由胸中邪正不分是非無別知有童貫而不知有社稷焉耳徽宗之心何心哉

以復燕
雲也

九月以白時中為太宰李邦彥為少宰趙野字文粹中為尚書左右丞蔡懋同知樞密院事○冬十一月王黼有罪免

黼位元宰每倍曲宴親為俳優鄙賤之役以獻笑取
悅太子聞而惡之黼以鄆王楷有寵陰為畫奪宗之
計未成及帝幸其第觀芝而黼第與梁師成連牆穿
便門往來帝始悟其與師成交結狀還宮眷侍頓衰
李邦彥素與黼不協陰結蔡攸共毀之會中丞何臬
論黼姦邪專橫十五事遂詔黼致仕其黨胡松年等
皆免

廣義

分注載詔黼致仕嗚呼刑與禮一致也故尚
書傳曰禮刑一物也失禮則入刑蓋有罪者

加之以刑無罪者待之以禮比古今之通議也且
王黼欺君誤國其罪不可以縷數既云有罪則當
依律抵之烏可以禮去官邪徽宗馭臣而措置顛
倒若此譬則遇寒疾不汗而昏潰之甚者也不亡
得乎故綱目於分注止載王黼致
仕而大書則曰有罪者誅奸佞也

置講議財利司罷應奉司

自蔡京倡豐亨豫大之說勸帝窮極侈靡久而帑藏空竭言利之臣殆析秋毫宣和以來王黼專主應奉括剝橫賦以羨為功所入雖多國用日匱至是宇文粹中上言祖宗之時國計所仰皆有實數量入為出沛然有餘近年諸局務應奉司妄耗百出若非痛行裁減慮智者無以善後於是詔蔡攸就尚書省置講議財利司除茶法已用定制餘並講究條上攸請內侍職掌事干宮禁應裁省者委童貫取旨由是不急之物無名之費悉議裁省帝亦自罷諸路應奉官吏減六尚歲貢物

發明

古之足財用者傳有之曰國無遊民則生之者衆矣朝無幸位則食之者寡矣不奪農時

則為之者疾矣量入為出則用之者舒矣夫如是則財安有不足者乎徽宗惑於權奸窮極侈靡虛

內事外費出無經生之者既寡食之者既衆為之者不疾用之者不舒則國用竭矣雖講而議之復何益哉孟子曰王何必曰利亦有仁義而已矣人主觀此則知侈用必至於傷財傷財必至於害民故愛民必先於節用而無益妄費不可形之於念慮也知乎此然後可論興衰撥亂之說也

廣義

是舉也美則美矣君子惜之蓋亦噬臍無及矣

十二月詔蔡京復領三省事

王黼既致仕朱勔力勸用京帝從之京至是四當國目昏眊不能視事悉決于季子條凡京所判皆條為之至代京入奏之條每造朝侍從以下皆迎揖咕囁耳語堂吏數十人抱案後從由是恣為姦利竊弄威柄驟引其婦兄韓偓為戶部侍郎媒孽密謀斥逐朝士創宣和庫式貢司四方之金帛與府藏之所儲盡

拘括以實之為天子私財白時中李邦彥等惟奉行文書而已

廣義

古者四十始仕七十致仕蓋仕始於四十者精力強壯足以有為而能幹君之蠱況不為

他岐之惑也仕致于七十者精力衰耗不能有為而致匪躬之節况當全考終乎此為賢人士夫出處而設彼其藏奸蓄穢以妾婦之道事君者不與焉歷觀蔡京諂事徽宗其於精力強壯之時固未嘗以道事君至其末年精力衰耗則昏惑愈甚邛僻愈滋宜其不顧廉耻而所為又浮於前也今蔡京既已致仕而徽宗復起之者譬猶酒癖膏肓而又加以耽毒是自速其斃也而由人乎哉

河北山東盜起

時轉糧以給燕山民力疲困重以鹽額科歛加之連歲山荒於是饑民並起為盜山東有張仙者衆至十

萬又有張廸者衆至五萬河北有高托山者號三十萬自餘二三萬者不可勝數

都城有女子生髭詔度為道士

都城中酒保朱氏女忽生髭長六七寸疏秀甚美宛然一男子特詔為道士又有賣青果男子孕而誕子

發明

凡書有者所未嘗有者也生髭乃男子之常理女子生髭此所以反常而為異耳夫女子

陰類而生髭則是女變為男陰化為陽則小人竊發之子為陽小人為陰茲既陰化為陽則小人竊發之機兆矣陰陽譴告之驗明矣徽宗目擊茲異罔肯省身度為道士夫復何說噫曾是以為應變之策乎既而河北山東相繼盜起而女真由是乘之天下擾亂弗克支矣書之足以著其垂亡之徵也

乙巳七年春正月遼延禧如党項二月至應州金將羅索

獲之以歸

遼主畏中國不可仗謀奔西夏會党項小呼嚕遣人請遼主臨其地遼主遂趨天德過沙漠金兵忽至遼主徒步出走乘從者馬得脫途次絕糧從者至嚙冰雪以濟饑過天德至夜將宿民家給曰偵騎其家知之乃叩首跪而大慟潛宿其家居數日喜其忠遙授以節度使遂趨党項以小呼嚕為西南面招討使總知軍事二月至應州新城東六十里為金將羅索等所獲遼遂亡

發明

春秋之法內入國而以其君來外滅國而以

然延禧無降服之狀強獲以歸而遂志也或以為延禧亡國之君故其斥名書獲以罪之曰非也亡國之詞有三死之上也走之雖非猶有耻焉降則為下矣金人恃強叛遼凡十有四年而見滅延禧

在顛沛流離之中尚圖興復罔肯降讐不得已而為羅索所獲非服為臣僕之比也然不曰遼亡者外而不內貶之詞也延禧有社稷之讐不與共天下播越沙漠效死不降至於力屈就擒其志可尚也則延禧為君之道得矣

廣義

自古敗亡之國未嘗無死節之臣何遼之亡也寂無一人焉蓋由天祚荒淫匪仁匪義有

以導之故其施報至於如此也孟子曰君之視臣如手足則臣視君如腹心君之視臣如犬馬則臣視君如國人君之視臣如草芥則臣視君如寇讐蓋以此耳觀其自女真擾攘以來其間但見有所部降者有以謀反誅者有據遼陽以叛者且壽春遼東渤海遼之名郡也降于金若建瓴耳節義之士無聞焉顯乾懿豪徽成川惠遼之藩屏也陷于金若走壩耳節義之臣不見焉耶律托卜嘉上

京留守也以城降金而無固守之心耶律伊都遼之懿親也以怨降金而懷反噬之毒走雲中而遺金印也臣下輕之如浮雲遁夾山而立新主也臣下棄之如敝屣祥袞之家遼主奔之而無救援之意耶律達實遼主逆之而起自立之謀衆叛親離卒至於亡可哀也已易曰乘馬班如泣血漣如其謂天祚之

遼耶律達實稱帝于奇爾滿

先是達實以諫遼主不從遂殺北院樞密蕭伊蘇自立為王率衆西走至哈屯城駐于北庭都護府會西鄙七州十八部王諭以興復事得精兵萬餘置官吏立排甲具器械又遺書假道于回鶻王必里克必里克得書即迎至耶願質子孫為附庸送至境外所過敵者勝之降者安之兵行萬里歸者數國獲牛羊駝

馬不可勝計至塔實干西域諸國舉兵十萬號呼爾察來拒戰達實分所部為三軍進擊大敗之僵屍數十里駐兵塔實干凡九十日回回國王來降貢方物又西行至奇爾滿羣臣共冊立達實為帝改元延慶上尊號曰天祐皇帝妻蕭氏為昭德皇后是為西遼

發明

時延禧既獲遼祚已亡達實據有土地稱帝改元而必於延禧既獲之後使遼之統緒不

絕祀典有歸其志亦可嘉尚已然達實稱帝即書于下者又以見達實有紹續本國之意故亦書而及之也其與五代漢劉崇稱帝于晉陽同意君子宜並觀之

廣義

觀夫達實諭七州十八部王之言若有忠肝義膽恢復疆宇之志者也至於在道間關降

附者衆似可以回轅東向以復不共戴天之讐今乃鼓行而西至于窮沙極漠之地何哉其心不過

欲自帝耳于時東歸烏能帝哉故綱目書稱帝者所以著達實無君之心也詳味書法其義得矣

夏四月勒蔡京致仕

蔡條鍾愛于京擅權用事具兄攸嫉之數言于帝請殺條帝不許白時中李邦彥亦惡條乃與攸發條奸私事帝怒欲竄之京力丐免乃止勒停侍養固安置韓偓于黃州褫條侍讀毀賜出身敕欲以撼京而京猶未上去志帝乃命童貫詣京令上章謝事貫至京泣曰上何不容京數年當有相讒譖者貫曰不知也京不得已以章授貫帝命詞臣代京作三表求去乃降詔從之

發明

勒者強逼之詞蔡京貪位慕祿進不知止前書詔致仕此書勒致仕其意可見矣蓋君子

難進小人易戚乾之初九陽始萌坤之初六陰始生陽始萌則曰潛龍勿用方方隱而未可以進也

陰始生則曰履霜堅冰至言雖微而必至於盛也
觀聖人之言可以知君子之難進小人之易盛矣
蔡京再相專權自恣父子構隙遂成仇讐誠不可
以帥正百僚也直書曰勒則昏夜乞哀苟焉無恥
而進不知止之情益著
矣人臣視此寧無警哉

廣義

嗚呼父子兄弟天合者也君臣義合者也蔡
京之與二子其逆理違天也特甚徽宗獨不

思曰條攸之親弟也親弟尚欲殺之其能忠於我
乎京於二子尚不能教之其能以道事我乎一思
之間羣邪立辨其於斥逐三人也何有惟其不然
所以成伊誤國欺君之惡耳況乎人之所以為人
者莫大乎恥也故曰存之則進于聖賢失之則入
于禽獸觀京泣訴童貫何其無恥之甚邪易曰勿
用取女見金夫不有躬無攸利蓋言丈夫不可用
此無恥之女猶人君不可用此無恥之臣也徽宗

何足以知此書曰勒者所以著蔡京之貪戀無恥也

復元豐官制

詔行元豐官制復尚書令之官虛而不授三公但為階官毋領三省事

六月封官者童貫為廣陽郡王

帝援神宗遺訓能復全燕之境者昨土錫以王爵封貫為王

發明

童貫初見綱目既揭官者書之自此拜官封爵但書其姓名而已至是又揭官者書之何

前既正其始此復正其終也尚書云德懋懋官功懋懋賞小人雖有功但當優以金帛徽宗以其能復全燕之地封以廣陽郡王於乎名器亦倒施矣童貫姦諂奴材初無過人才德伐夏以困闢右之

民政遼以疲河北之士庇權奸而小人之道長
奢侈而天子之心荒迹其所為厥罪罔赦然歷考
漢唐以來閹宦之禍雖云迭盛亦不過假之以兵
權寵之以干政而未聞有加於王爵者加以王爵
此宋之大病也故綱目特書封宦者童貫為
廣陽郡王所以明其不當封耳其旨嚴哉

廣義

分注云神宗遺訓能復全燕之地者昨土錫

用虛耗市此全燕空地號曰收復所謂設虛名而
受實禍也徽宗被其愚惑速而不悟哀哉況乎宦
者封侯穢汗青史至今為識者所笑徽宗之於童
貫也殆有甚焉向嘗錫以上公之爵猶未足以為
尊至此加以王爵可謂尊之極矣綱目因之而書
宦者童貫所以著徽宗爵及惡德之失也嗚呼嚴
哉

前寶文閣待制劉安世卒

安世為章惇蔡卞蔡京所忌連貶竄極遠惡地無不歷之至是卒安世少從學于司馬光平居坐不傾倚書不草率不好聲色貨利忠孝正直皆取則于光除諫官在職累年正色立朝其面折廷諍或逢威怒則執簡却立俟威少霽復前抗辭旁列者見之蓄縮聳汗年既老羣賢凋喪畧盡巋然獨存以是名望益重梁師成用事能生死人心服其賢求得小吏吳默常趨走前後者使持書唱以即大用默勸為子孫計安世笑謝曰吾若為子孫計不至是矣還其書不答蘇軾嘗評元祐人物曰器之真鉄漢王偁曰君子小人兩立君子必惡小人而小人必忌君子此朋黨之論所以興也方元祐之際朝多君子如安世忠直有餘特疾惡太甚以激小人之怨及章惇得志而流毒縉紳貽患國家朋黨之禍徧於四海烏虜天下不幸

小人竊君之權使生民受敵為君子者宜求其所以
勝小人之術而無務於口舌力爭啟其狼戾不肖之
心以重天下之不
幸庶幾其有濟乎

發明

凡卒前官錄賢也安世正直立朝不附羣小
而為權奸之所嫉貶竄遐方終身弗用豈不

深可惜乎故綱目於其卒而特具其官者皆所以
深予之也宋有是人弗克大用徒為之老死擯棄
尚可謂有人
之國哉吁

秋七月熙河蘭州河東地震

熙河地震有裂數十丈
者蘭州尤甚倉庫皆沒

發明

去年閏月書京師河東陝西地震今年書熙
河蘭州河東地震蓋地乃陰道而敵國小人

則陰類有其事必有其應未有無其事而有其應者以氣合氣以邪感邪而一毫之差忒無有焉是時強敵竊發小人盈朝而地道不寧兩見綱目然則災異之來豈可視為泛常而不恤乎能畏天則雖遇異而變祥不能畏天則雖遇祥而化異在乎人君之脩為何如耳綱目特書于冊以見人心天道之不可誣也有天

下者其可不鑑哉

八月金烏奇邁廢遼延禧為海濱王

遣使以獲遼主來告慶

九月有狐升御榻而坐

時又有都城東門外鬻菜夫至宣德門下忽若迷罔釋荷擔向門戟手且詈云太祖皇帝神宗皇帝使我

來道尚宜速改也邇卒捕之下開封獄一夕方省則不知向者所為乃於獄中盡之

發明

水火兵戎之謂災山川崩竭之謂異是皆害及民物春秋必書徽宗嗣位二紀于茲水火

兵戎之災固多山崩川竭之異不少蓋由逆氣所激因而生之自綱目所書山崩地震日食彗孛大旱大水蝗疫則有之矣然未聞書狐升御榻而坐者御榻至尊極嚴之地狐乃荒原曠野之物以荒原曠野之物居至尊極嚴之地其異滋甚是則春秋之法所必書者蓋遇災而懼當加修省也以狐而升御榻則宋人失據中原之兆明矣變不虛生災不妄作下書金將尼瑪哈幹里雅布分道入寇其應豈不明且切哉宋之君臣溺於宴安不思警省是以終淪危亡而不可以救藥也吁

廣義

說文曰狐妖獸也昔者楊再思諂佞戴令言賦兩脚狐以譏之徽宗之時諂佞滿朝其最

甚者蔡京父子童貫王黼也觀分注所云豈非趙
宋宗社之靈以彰徽宗近佞之惡而欲其改歟夫
變常之謂怪聖人之所不語者語常而不語變也
故曰國家將亡必有妖孽今也狐升御座則是諂
佞專權之兆也豈非妖孽之甚者
乎厥後汴宋亡于諂佞其兆明矣

冬十月金將尼瑪哈斡里雅布分道入寇

初斡里雅布在平州遣人索叛亡戶口朝議弗遣且
聞童貫郭藥師治兵燕山斡里雅布請于金主曰苟
不先舉伐宋恐為後患金主以為然而未敢輕舉及
使者往返既數道路險易朝廷治否府庫虛實漸得
要領而耶律伊都劉彥宗亦言南朝可圖師不必衆
因糧就兵可也及既獲遼主遂即決意南侵以安班
貝勒舍音領都元帥居京師尼瑪哈為左副元帥古
紳為元帥右監軍耶律伊都為元帥右都監自雲中

趙太原達蘭為六部路都統棟摩為南京路都統劉
彥宗為漢軍都統幹里雅布監棟摩彥宗兩軍戰事
自平州
入燕山

廣義

蓋開兵出無名事故不成故用兵貴乎有名
也分注載童貫郭藥師治兵燕山不知此兵

何名也然則金人來索戶口叛亡者因宋弗遣而
舉兵則是宋師無名而金人有名矣故曰利人土
地謂之貪兵兵貪者敗不得已而起謂之應兵兵
應者勝觀此則知宋兵貪兵也金兵應兵也一勝
一負其機決于此矣且敵人之擾中國以名實相
副之師臨之尚憂其不服況無名乎曰然則於金
何以入寇書
蓋尊中國也

十一月郊

欽定四庫全書

卷十

帝纔下壇而密報金將犯界左右秘之曰恐妨恭謝宰相亦不知也及恭謝畢宰相又共匿之不以聞

發明

郊廟常事不書失禮則書甚矣小人之弄其君有同兒戲也金人入寇已經踰月比正宵

衣盱食不遑寧處之時而宋之君臣方且從容自如舉行郊祀謂之何哉考之分注左右秘之恐妨恭謝宰相知之匿不以聞嗚呼羣臣惟事蒙蔽蔽宗益肆驕奢欲求天下不亂烏可得乎自金人入寇而天下分為南北矣然則小人之禍可勝言哉特書曰郊深貶之也

太常少卿傅察使金不屈死之

察為金賀正使至境遇幹里雅布兵脇之使拜且降不拜左右捍之伏地愈植立反覆論辨不屈遂遇害察堯俞從孫也十八登進士蔡京嘗欲妻以女拒弗答平居恂恂然若無所可及倉猝狗義聞者莫不

壯之後
諡忠肅

發明

使於四方不辱君命此固人臣之高行也傳

不辱君命抑且不辱其身矣雖云被害忠何損乎
世有偷生苟免求生害仁而蒲伏丐命於強敵之
前者視察寧不為之汗顏哉故家語曰人臣之節
當君大事惟力所及死而後已察無愧焉綱目特
以全節予之所以為
人臣狗國之一勸耳

召种師道為兩河制置使

時師道致仕居南山豹林谷金人南下趨召之師
道聞命即東過姚平仲有步騎四千與之俱赴汴

十二月童貫自太原逃歸金尼瑪哈陷朔代州遂圍太

原

先是金人遣使來許割蔚應州及飛狐靈邱縣帝信之遣童貫往受地至太原聞尼瑪哈自雲中南下貫乃使馬擴辛興宗往使諭以交割地事擴至軍前尼瑪哈嚴兵以待趣擴等庭參如見金主之禮既畢首議山後事尼瑪哈曰爾尚欲此兩州兩縣邪山前山後皆我家地尚復何論汝家別削數城來可贖罪也汝輩可即去我自遣人至宣撫司矣擴還具言于貫貫曰金初立國邊頭寧有幾許軍馬遽敢作如此事邪擴曰彼既深恨本朝結納張穀又為契丹舊臣所激故謀報復今宜速作備禦貫不從既而尼瑪哈遣王介儒色埒默持書至太原責以渝盟納叛等事詞語甚倨貫問之曰如此大事何不素告我色埒默曰兵已興何告為宜速割河東河北以大河為界用存宋朝宗社乃報國也貫聞之氣褫不知所為即欲假

赴闕稟議為名適還京師知太原府張孝純止之曰
金人渝盟大王當會諸路將士極力枝梧今大王去
人心必搖是以河東與金也河東既失河北豈可保
耶願少留共圖報國兼太原地險城堅人亦習戰未
必金便能克也貫怒叱之曰貫受命宣撫非守土也
必欲留貫置帥臣何為遂行孝純嘆曰平生童太師
作幾許威望及臨事乃蓄縮畏懼奉頭鼠竄何面目
復見天子乎尼瑪哈引兵降朔州克伐州都巡檢使
李翼力戰被執罵賊死尼瑪哈
遂進圍太原孝純悉力固守

發明

逃者匹夫之事貫居太原金人入寇當與守
臣力拒雖死可也幸而敵退苟見免焉即選

將練兵分屯要害則不辱君命矣不能以理自明
而反效匹夫之行適逃苟免趣還京師不亦賤乎
特書曰逃以著其幸免而不知命之罪也貫既逃
歸宋不能討失政刑矣書自太原逃歸又以罪宋

也童貫既去河東益孤而相繼陷沒浸不克支悲夫徽宗信任童貫猶如腹心而臨難苟免惟恐或後然則閹人之無益於國豈不信哉

廣義

嗚呼國之大事莫戎事若也官者童貫牧羊豎耳曷足以堪大事乎臣聞兩兵相接曰戰

戰敗而走者有之輕行而掩曰襲被襲而遁者有之環其城邑曰圍潰圍而出者有之未聞有敵使方至一見其辭倨傲而遽爾逃歸者也書曰知人則哲能官人此聖帝明王之所難固不可責之徽宗也雖然徽宗非聾非瞽特以私欲蔽銅之深而受其蠱惑耳然一日之內豈無片時天理之呈露耶童貫日侍徽宗其親昵又非其他官者之比而不能揣知其臧否之一二其可怪也夫觀分注載張孝純之言足以貽笑千古後世人主欲委大事於閹宦者當以童大王為戒

金幹里雅布入檀薊州郭藥師以燕山叛降金盡陷燕
山州縣

初郭藥師與詹度同職自以節鉞欲居度上度以御
筆所書有序藥師不從加以常勝軍橫暴藥師右之
度不能制朝廷慮其交惡命蔡靖代度靖至坦懷待
之藥師亦重靖稍為抑損及安中被召靖代知府事
藥師每令部曲持良械精甲貿易於他道為奇巧之
物以奉權貴宦侍譽言日聞于帝遂再制一路增募
兵至三十萬而不改契丹服飾朝論頗以為疑進拜
太尉召之入朝藥師辭不至帝令童貫行邊陰察其
去就不然則挾之偕來貫至藥師拜迎帳下貫避之
曰汝今為太尉與我等耳比禮何為藥師曰太師父
也藥師唯拜我父焉知其他貫釋然遂邀貫視師至
于迥野畧無人迹藥師下馬當貫前掉旗一揮俄頃

四山鐵騎輝日莫測其數貫衆皆失色歸為帝言藥師必能抗敵蔡攸亦從中力主之謂其可倚故內地不復防制屢有告變及得其通金國書朝廷輒不省度又言藥師瞻視非常趣向懷異逆節已萌凶橫日甚始詔遣官究實而金兵已南下幹里雅布自平州破檀薊至三河蔡靖遣藥師及張令徽劉舜仁師師四萬五千迎戰于白河兵敗而還藥師遂帥所部兵劫靖及都轉運使呂頤浩以降幹里雅布執靖頤浩置軍中以行於是燕山府所屬州縣皆為金有幹里雅布得藥師益知宋虛實因為鄉導懸軍深入矣

發明

入者逆而不順之辭所以抑強敵也叛者作亂悖逆之辭所以討有罪也嘗觀信任叛亡

之君未始不為叛亡所誤漢武之信江充而父子之情垂梁武之信侯景而君臣之義廢藥師遼之

叛將宋射一時之利委以腹心之托加官賜予言
聽計從雖聞間言無復深慮殊不知於殺張穀之
時叛意已萌矣而乃畀之節鉞寄之全燕謂之何
哉然藥師所歸者惟涿易二州而併失全燕之地
雖欲悔之其可及乎自藥師叛降金人備知虛
實而懸軍深入矣綱目直書君臣交罪之也

廣義

嗚呼人之死也死於心腹受病者常多死於
四體不仁者常少何也蓋四體不仁容或可

以少瘥若夫心腹者軀命所關苟或受病日深則
中必崩潰雖俞扁莫能愈焉奸人誤國何以異於
是哉若郭藥師者崩潰心腹喪身之惡疾也觀其
在遠則叛遼而降宋在宋又叛宋而降金當夫邀
貫視師之日揮衆一集明示欲叛夫何童貫昏愚
不察反以其能禦敵而遣之邪彼其敗績于白河
者乃藥師之詐也不然獨降于金可矣何以執蔡
靖同降哉是役也不以藥師禦敵則宋金勝負未

可知矣噫當藥師降宋之時遼之心腹被其崩潰而死宋之心腹已受其病特其病之尚穉未足以殺其軀焉耳至此降金則宋之心腹崩潰而其身於是乎死焉然則是疾也如是之毒而卻之之術何居曰不縱欲不貪求親賢遠佞養吾元氣而已

罷花石綱及內外製造局○詔內侍梁方平帥衛士守
黎陽

帝以金人南下悉以禁旅付內侍威武軍節度使梁方平守黎陽步軍都軍候何灌謂白時中曰金人傾國遠至其鋒不可當今方平掃精兵以北在京皆疲弱也萬一方平不枝梧何以善吾後盍留以衛根本
不從

發明

金人南寇勢甚猖獗為宋計者誠宜亟求備禦之策蓋嚴出入之防選猛將訪謀臣分守

要害以遏敵衝必如師之丈人始得吉而無咎方平無知閹人之以供灑掃之役則有餘以之任將帥之職則不足易曰負且乘致寇至以小人而乘君子之器盜思奪之矣徽宗信任童貫卒以覆國矧一童貫未去一童貫復用者哉他時師敗黎陽金人深入京師不保中原隨陷寵用閹人果何益耶此徽宗所以終於敗亡而不悟也直書于冊失自見矣

發明

書詔內侍梁方平者譏其陷童貫之覆轍也

以皇太子為開封牧

帝以京師日迫為憂蔡攸探知帝意欲內禪引給事中吳敏入對宰執皆在敏前奏事且曰金人渝盟舉

兵犯順陛下何以待之帝威然曰柰何時東幸計已定命李稅先出守金陵敏退詣都堂言曰朝廷便為棄京師計何理也此命果行須死不奉詔宰執以為言稅遂罷行而以太子為開封牧

詔天下勤王許臣庶直言極諫罷道官及行幸諸局

初宇文虛中為童貫參議官虛中以廟謨失策主帥非人將有納侮自焚之禍上書極言之王黼大怒又累建防邊策議皆不報及金人南下貫與虛中還朝帝謂虛中曰王黼不用卿言今事勢若此柰何虛中對曰今日宜先降詔罪已更革弊端俾人心天意回則備禦之事將帥可以任之帝即命虛中草詔畧曰朕以寡昧之質藉盈成之業言路壅蔽面諛日聞恩倖持權貪饕得志縉紳賢能陷于黨籍政事興廢拘于紀年賦歛竭生民之財戎役困軍旅之力多作無益侈靡成風利源酷權已盡而牟利者尚肆誅求諸

軍衣糧不時而冗食者坐享富貴災異謫見而朕不寤衆庶怨懟而朕不知追惟已愆悔之何及思得奇策庶解大紛望四海勤王之師宣二邊禦敵之畧永念累聖仁厚之德涵養天下百年之餘豈無四方忠義之人來徇國家一日之急應天下方鎮郡縣守令各率衆勤王能立奇功者並優加獎異草澤異材能為國家建大計或出使疆外者並不次任用中外臣庶並許直言極諫帝覽之曰今日不吝改過可便施行虛中又請出官人罷道官及大晟府行幸局暨諸局務

發明

與治同道罔不興與亂同事罔不亡徽宗仁明之君固當剗革弊政期抵太平矣自崇寧

初年侈心一動喜佞樂諛黜忠彥而用蔡京於是塞言路斥正人興大獄事邊功窮聚斂縱奢侈溺聲色盜遊逸事神怪凡亡國敗家之事靡一不舉重以童貫王黼之徒交煽其禍天下雖欲不亂不

可得也向使金人不入寇則是荒淫之君可以長
福祚而奸邪誤國之徒亦可以長保無虞矣上天
降罰變起幽燕四海分崩兩河覆沒凡前日媒亂
之事次第革罷深自追悔然後知治忽所繫毫杪
不差而小人得志未有不反其初者綱目於金人
入寇書之甚輕則見其為寇已久畧無預防之意
至於徽宗禦侮之事則書詔內侍梁方平帥師守
黎陽詔天下勤王用見武備之弛至命宦者為將
至召天下之兵其為後王
鑒豈不深切著明也哉

廣義

分注載帝命宇文虛中草詔罪已何其自責
之明且切哉或曰漢武帝之輪臺唐德宗之

奉天皆罪己也二君之國何以不亡而徽宗獨亡
乎曰三君之詔名同而實異者也何以言之蓋武
帝德宗有亡國之事而無亡國之臣徽宗既有亡
國之事又有亡國之臣故也觀夫武帝之時如田

鴻臚之明見霍子孟之孤忠李廣利之將畧輔弼者多諛佞者少當時聚斂如桑弘羊言者欲烹况乎盜賊雖多終不如金人之強武帝奚其亡德宗之世如陸敬輿之忠鯁李常侍之啓沃李西平之忠勇奉公者多徇私者少當時欺罔如裴延齡論者不置又况吐蕃雖強亦不如金人之威德宗奚其亡徽宗則不然耳侈靡過武帝括財浮德宗蔡京王黼等諂佞于內童貫方平等典兵于外其視武帝德宗之臣奚翅孰優而孰劣孰得而孰失乎羣小在朝衆賢在野阿諛者為順旨姦回者為忠直凡百所為其有戾于武帝德宗者多矣又况金人強盛實非徽宗之才可以禦之也其詔雖曰罪已要亦噬臍無及矣徽宗宜其亡

召熙河經畧使姚古秦鳳經畧使种師中將兵入援

時欲召古師中令以本路兵會鄭洛外援河陽內衛京城帝命宇文虛中為河北河東路宣諭使護其軍虛中以檄召古師中兵馬令直赴汴京應援

發明

時金人憑陵君父蒙難此正臣子捐軀報國倡義勤王之秋也夫何古等既擁強兵坐視

不救必待詔趣然後入援義者必急其君豈若是哉直書曰召蓋譏之也

以吳敏為門下侍郎

帝東幸之意益決太常少卿李綱謂敏曰建牧之議豈非欲委太子以留守之任乎今敵勢猖獗非傳太子以位號不足以招徠天下豪傑敏曰監國可乎綱曰肅宗靈武之事不建號不足以復邦而建號之議不出於明皇後惜之上聽明仁恕公曷不為上言之翌日敏入對具以綱目白帝帝即召綱入議綱刺臂

血上疏曰皇太子監國禮之常也今大敵入攻安危存亡在呼吸間猶守常禮可乎名分不正而當大權何以號召天下若假皇太子以位號使為陛下守宗社牧將士心以死捍敵天下可保帝意遂決明日宰臣奏事帝留李邦彥語敏綱所言遂拜敏綱下侍郎草詔傳位

廣義

鳴呼忠臣義士無世無之顧人君用舍何如耳觀夫徽宗之時親近者莫如童貫蔡京王黼

黼疎遠者無如吳敏李綱當童貫蔡京王黼胡行妄作之時徽宗不識吳敏李綱何如人物也然而披露忠肝義膽於國步艱難之秋不在於親近之童貫蔡京王黼而在於向義排難之吳敏李綱其人品之賢不肖有如是夫君人者不可不慎其用舍

帝傳位于太子太子即位尊帝為教主道君太上皇帝

皇后為太上皇后

帝下詔禪位太子自稱曰道君皇帝太子入禁中被服涕泣固辭不許遂即位尊帝為教主道君太上皇帝退居龍德宮以李邦彥為龍德宮使蔡攸吳敏副之

發明

徽宗傳位太子此固一時權宜異於唐之玄宗矣然即位二紀窮極奢侈淫國事急荒四海

鼎沸及其金革彌興心喪膽落縮首無策傳位太子嗚呼徽宗享逸樂於平時懼危亡於亂世烏足謂之中國人以上者乎迨至太子嗣位尊為教主道君以萬乘之尊為道教之主至於沒齒而尚不悛善乎劉文安公曰今日為教主道君皇帝於宋何其尊也以此欺愚眩眾不自知他日封為昏德公於金而不勝卑辱矣可勝嘆哉綱目據事直書所以深譏之爾

廣義

臣聞以道化天下者曰皇伏義神農黃帝是也以德治天下者曰帝少昊顓頊帝嚳堯舜

是也道與德非有二皇與帝其理同然而名號之殊者乃後人尊稱之異耳亦非當時數聖人自稱之也至秦呂政自謂功過三皇德兼五帝故總自稱為始皇帝云以明道德皆萃于其身故也何其不知量哉後世臣子遂因襲之皆稱其君父曰皇帝如呂刑稱舜者此皆尊敬君父之誠心夫何足怪故魯君侯爵孔子以公稱之尊君父也聖人尚爾况去聖人之萬萬者哉今徽宗自稱為道君皇帝者臣知其所謂道者惟是靈素之道豈皇帝之道邪至其厥子猶弗知悟又尊以教主之名且彼所謂教者亦以靈素之道為教而又非以皇帝之道為教也厥後父子得號昏德重昏者不亦宜乎

以李綱為兵部侍郎

欽定四庫全書

卷十

綱上書言方今中國勢弱君子道消法度紀綱蕩然無統陛下履位之初當上應天心下順人欲攘除外患使中國之勢尊誅鋤內奸使君子之道長以副道君皇帝付託之意召對延和殿時金議割地綱言祖宗疆土當以死守不可以尺寸與人帝嘉納之拜兵部侍郎

廣義

嗚呼李公之言何其綱正明白誠嗣王新服厥命之藥石也使徽宗預用李公又何至于

今日之顛沛乎書稱知人之難信矣哉

赦○立皇后朱氏

后武康節度使伯材之女

以耿南仲簽書樞密院事

南仲帝東
宮舊僚也

遣給事中李鄴使金

告內禪請修好鄴至慶源府幹里雅布欲還
郭藥師曰南朝未必有備不如姑行從之

廣義

汴宋之亡亡於叛臣郭藥師之一言
耳孔子曰一言可以喪邦豈其然乎

太學生陳東上書請誅蔡京等六人

時天下皆知蔡京等誤國而用事者多受其薦引莫
肯為帝明言之東率諸生上書曰今日之事蔡京壞
亂於前梁師成陰賊於內李彥結怨於西北朱勔聚
怨於東南王黼童貫又從而結怨于二敵創開邊隙
使天下勢危如絲髮此六賊者異名同罪伏願
陛下擒此六賊肆諸市朝傳首四方以謝天下

發明

陳東請誅六人而必以蔡京為首者討首惡也京等蠹君疲國結怨天下雖擢髮不足以


數其罪也外患之來非京等有以啓之乎王氏滯曰事君之道苟利社稷死生以之若顧嫌避咎此人臣不忠之利非人主社稷之福時天下已亂強敵憑陵京等享爵自如畧不之罪陳東乃太學生貞初無官守之寄又無言責之託亦能上書糾劾忠憤激烈宋庭諸臣寧不為之少愧哉觀於此則東討賊之心切而憂國之心誠矣直書于冊深予之也

廣義

嗚呼陳東之言賈太傅所謂痛哭者是也欽宗即位之初一得陳東之書正當奮乾剛之

斷即以六奸肆諸市朝詔告天下將見天下之懷忠秉義者莫不曰有君如此我可不出而輔之且大奸脫距黨勢自孤不能為害也必矣況金人一聞新君如此有為氣亦少沮汴宋基圖孰能搖之

今於陳東之言既嘉納之又不能行足見其不能
有為也噫不能有為於其始安能有為於其終邪
書曰去邪勿疑惜乎
欽宗不足以語此



御批續資治通鑑綱目卷十